

ХИНД ИХТИЛОЛЧИЛАРИ

Беш пардали фожиа

КИМСАЛАР...

Раҳимбахш — хинди, ўқиган бир йигит.
Дилнавоз — хинди бир қиз, Раҳимбахшнинг севгани.
Лолаҳардиёл — хинди қаландар (дарвеш).
Ўкунар — Лоҳур шаҳрининг пўлис бошлиғи (англиз).
Мавлоно Нўъмон — Хинд-Афғонистон чегарасидаги Бунир
қўргонининг бошлиғи, бир мавлоно.

Фулом Наби — Мавлоно Нўъмоннинг хизматчиси.
Марлинг — англиз жосуси.

Абдусуббух
Файзи Аҳмад
Бадринат
Дийнанат
Орномсингх
Фазлуллоҳ
Маҳмудхон
Роду биби — хинди хотун, Ўкунарнинг хизматчиси.

Хинд ихтилолчилари.

Пунтар }
Порлинсун } англиз мингбошилари.

Тиланчи хотун, экинчилар, инқилобчилар, ишчи-
лар, пўлислар, бир юзбоши, қоровуллар.

БИРИНЧИ ПАРДА

Эрта билан Лоҳур шаҳри ёқасинда ям-яшил, кенг бир ўлан, гул бута-
лари, аргувон оғочлари ҳар ён очилған. Раҳимбахшхон кўкламлар узра
узаниб ётған. Оқ, қисқа камзул, тубани тор, усти кенг бир иштон кий-
ган. Бошинда ҳинд фўтаси¹, сёғинда пайзор². Бир ёнда Дилнавоз гул
териб турадир. Гул буталари орасинда сайраб турган бир булбулнинг
ёни, қайноқ товуши саҳнадаги жимжитликни титиб юбормоқда. Ўй-
тушунча тенгизизда тўлиб қолған Раҳимбахш булбулнинг тингани билан
ойилған бўлуб³ бошин кўтапар, руҳи юксалган сари кўз тикар, шу
дардлашманি сайрап.

Раҳимбахш.

Мунгли булбул, мунгдош бўлдик, кел сайра,
Бир қип-қизил гулга мен ҳам тутилдим.
Тинмағур қуш, қайғудошлиқ қиласийлик,
Мен-да сенек юрагимдан урилдим.
Сен тебраниб ўтрангин,
Мен ийқилиб инграйин.
Сен ўтли ун чекарда,
Мен қонли ёш тўкайин.

Булбул бир оз сайраб тинар, Дилянавоз қўлидаги гулга қалин бир
—бойғинлик⁴ билан қараб, шул қўшиқни ўқир.

Дилнавоз.

Сўйла, гулим, яширмагил, недирса дардинг,
Яраланмиш юрак, нечун қизардинг?
Кимлар сени бу қоп-қора ерга юборди,
Бу дунёда йўқ экан-да нелар қиласийлик?
Нега сени чулғаб олди бунча тиканлар?
Нечун чиқди юрагингдан юзга бу қонлар?
Сен билан мен яраланиб ётибмиз,
Бу чаманда шодлик берган кимлар эканлар?

Булбул бир оз сайраб тинар.

Раҳимбахш. Малаклар ботининг чечаги, чечаклар
дунёсининг қуши, кел, оёғингга тўкилган шунча қонли
юракни қўйиб, гулни терасан? Юртингда кесилиб турган
шунча ёзуксиз бошни унутиб, чечаклар биланми дардла-
шасан?

Дилнавоз. Нетайин? Шуларни-да англизлар учун-
ми қўяйин. Бутун дунёни олиб тўймаган англизлар улар-
ни-да олсунларми? Чечак билан дардлашганимни сўрай-
сан. Демак юрагимда дард борлиғин биласан, юрагимдаги
дард: юртимда ёзуксиз кесилган бошларнинг дарди эмас
эса. Надир? Нега маломат қиласан?

Раҳимбахш (ўйлар). Ноҳли малак... Қонли юраклар-
дан гапирмайин, кесилган бошлардан сўз очди. Демак би-
ринчисина аҳамият берилмайдир. (Сўйлар.) Йўқ... Қўйма.
Унларни англизлар олмасун, ҳиндинг гулини эмас, бир
тиканини ҳам англиз учун қўйма, бу ернинг гулини-да,
булбулини-да, илонини-да, тиканини-да уларга берма, шу
тиканлар билан уларнинг бағриларини теш, илонларига
қўнгилларини чақтириб, булбулларнинг нозли чўқуғучла-
ри⁵ билан кўзларини чиқар.

Англизга «дунёни олиб тўймаған» дединг. Тўғри! Ҳайвонлар орасинда тўйғанин билмагани учун ем ёнинда ёрилиб ўлгани кўб бўлур, буни ҳам унумта!

Сўзни кўб узатдим, ҳайда кел, чечакдан яратилған малак. (*Ерни кўрсатиб.*) Шу ерда шундай узан, бошингни кўкрагимга қўй, юрагимнинг ўртана-ўртана сўйлаган севги кўшиклиарини тингла! (*Дилнавоз қўлиндаги гулни юрагига ёқинлашибируб, Раҳимбахш сари юрар.*) Кел, шунга ўтири... Баним-да кўнглим бир дақиқалиқ саодат чори кечирсун. (*Дилнавоз келиб ўтиргач.*) Сўйла, малагим.

Дилнавоз. Севасанми мени?..

Раҳимбахш. Ишонмайсанми? Кел, юрагимни тингла, виждонимни сўйлат!

Дилнавоз. Тилингдан эшитмоқ истаймен.

Раҳимбахш. Тил севги ўлкасинда тилмочилик этолмас. Кўб кишилар ўз севгиларини тил билан бошқача кўрсатмак истайлар ҳамда кўрсата олалар. Бир кишининг сезгуларини тил орқали англамоқ истасанг, алданурсан.

Дилнавоз. Мени Ҳиндистонни севганингча севармисан?!

Раҳимбахш. Шунчами ушоқ тушунишлisen. Ҳиндистонни севганим сени севганим эмасми?

Дилнавоз (*юрак тебранишлари остинда*). Ҳинд улусин севганинг каби?

Раҳимбахш. Бола... Шуни билиб қўй. Юртини севганилар унинг тош-тупроқларини эмас, гўзаллик, яхшиликларини севарлар. Улус йўлинда жон берганлар унинг соқоли, чопони учун эмас, ортиқлиги, фазилати, тарихи учун ўларлар. Меним юрт, улусимнинг яхшилиқ, ортиқлиқ ҳам фазилатларининг бири, биринчиси сен эрурсан. Уларни севганим сени севганимдир.

Дилнавоз. Демак, мени чиндан севасан.

Раҳимбахш (*қайнаброқ*). Чиндан севаман, юракдан севаман, жондан севаман, виждондан севаман. Меним юрагимдаги севгини кўрсатмак учун севиш сўзи оздир. Топинаман сенга...

Дилнавоз (*ийглаёзид*). Мен-да севаман сени... Мен-да топинаман сенга.

Бир-бирларининг руҳларини тинглаган каби жим турадилар, бир оздан кейин булбул сайраб юборар. Иккала ўртоқ булбул товушининг титроқ кўтарилиши остинда бир дақиқалик роҳатчол кечиралар. Булбул тинар.

Дилнавоз. Раҳимбахш (*Раҳимбахш ҳорғин ҳолда турар*) иккимиз-да тупроқ дунёсиндан, тан ўлкасиндан ажрасак, дунёning қайгуларини эмас, шодлиқларини-да унусак, ер узра бор қўркувларнифина эмас, умидларни ҳам ташласок, қўлни-қўлга берсак, шу ёник қушнинг титроқ товушина эргашсак, биз ҳам титраб-титраб юқориларга тўғри юқсалсак, юқсалсак-да, у ерларда ҳам тинчлик қўрмаж, яна шу товӯш каби чексиз бўшлиқлараро йўқолиб кетсак... Бунлар бўлмас экан. Дунёнинг бир четида мана шу гул билан булбулдек иккаламизгина ўтириб қолсоқ, кимсанинг бизга ҳеч иши бўлмас...

Раҳимбахш (*ийглаёзид*). Дилнавоз. Гўзалсен. Эсизларим, ҳинд чечаги термоқ учун шу ерларгача келиб юрган англиз йигитларининг кўзларий сенинг юзинга-да тушар!

Дилнавоз (*ойиқид*). Тушса нима бўлур?

Раҳимбахш. Нима бўлурми? Куръон бетига ҳайвон оёғи тегмак нима эса, ҳинд қизининг юзига англиз кўзи тушмай ҳам шудир.

Дилнавоз. Нима демак?! Сен ҳинд қизини ўзин англиз бошмоғидан⁶ сақлай олмас, дебми биласан? Ҳинд қизининг кўзи шишаданмидурким, англиз йиртқичлигининг шунча қонли изларини қўрмасин?! Ҳинд қизининг юраги тошданмидирким, оёқлари остинда қолиб эзилган эл виждонининг яралари лочинларча қичқирғанин сезмасун. Бу кун бу ўлкада уларнинг юракларига қараб кулгучи бир қиз эмас, бир ит ҳам топилмас. Буни билиб қўй!

Раҳимбахш. Уни биламен, малак. Сиз англиз юзига қарапсиз, демадим. Унлар сизга қараплар. Дардим — шу!

Дилнавоз. Биз биламиз, унларнинг бизга қарапла-ри кўзларимизни чиқармоқ учундир. Унларнинг бизга кулишлари йиғлатмоқ учундир. Шунинг учун унларнинг қарапларига-да, кулишларига-да олданғучи кимса орамизда йўқдир. Ишониб қол!

Раҳимбахш. Бунга ишонғанмен, гулим.

Дилнавоз. Ишонған эсанг, битди.

Раҳимбахш. Йўқ, битмади. Тушунган кўнглимни қайғуси битмас.

Дилнавоз. Яна нима қолди?!

Раҳимбахш. Меним дардим бошқа.

Дилнавоз. Сўйла!

Раҳимбахш. Унларнинг сизга қарамоқларини истамаймен..

Дилнавоз. Ҳо-о... Онгладим! Шаҳар хотунлари каби мени ҳам қопга солдирмоқчимисен?!

Рахимбахш. Унча онгсиз эмасмен. Бурга учун кўрпани ўтга солмам. Ҳайвон тумшуғи тегмасин деб чечакни оғилға тиқмам. Хотунлар қамалсалар, тарбиясиз қоларлар. Тарбиясиз хотунлар улуснинг ўлими учун йўл очарлар. Тузук хотун кишилик боғчасининг гулидир. Гулни ҳайвондан сақламоқ тейиш⁷. Бироқ унинг учун гулни ерга кўммак эмас, ҳайвонни боғлаб қўярга керак. Сизни ҳам ҳайвон ҳавасли йигитлардан сақламоқ истаганлар ўзингизни чиритмак ўрнинда уларни бир оз тарбият қилсунлар!

Дилнавоз. Англизларни қандай тарбия қилурсан?

Рахимбахш. Англизнинг энг яхши тарбияси уни Ҳиндистондан қувмоқдир.

Дилнавоз. Қулайми бу?

Рахимбахш. Ишнинг қулайини ахтармоқ ялқовликдир. Қулай ишдан буюк унум чиқмас. Буюк унумли ишлар қулай-да бўлмас. Англизни Ҳиндистондан қувмоқ ер юзи ни ўз қора қанотлари остига олган бир олбостини йўқ этмоқдир. Қулай бўлмас. Нима бўлса ҳам, бир ёвни юртдан ҳайдамоқ, бир юртни ёв қўлида кўрмакдан қийин эмасдир.

Дилнавоз (севинч ҳам қайғу орасинда). Англизни Ҳиндистондан қувмоқ...

Рахимбахш. Эзгу ишларнинг бириңчисидир.

Дилнавоз. Буюк...

Рахимбахш. Ҳар нарсадан буюк.

Дилнавоз. Эзгу...

Рахимбахш. Ҳар ишдан эзгу.

Дилнавоз. Куръонни ҳайвон тепкисидан кутқаришдек буюк.

Рахимбахш. Чўқчани масжиддан ҳайдаш каби эзгу.

Дилнавоз. Оҳ...

Рахимбахш. Қайғурма!

Дилнавоз. Бўлурмикин?!

Рахимбахш. Нега бўлмасун?

Дилнавоз. Кўбдан ишонғум келмайдир.

Рахимбахш. Гўзалим, тингла, бизни шу қунларга тушурган нарса мана шул ишончсизлигимиздир. Ўз кучига ишонмаған эл кураш майдонига киролмас. Кирса ҳам, йиқилур. «Ишонмағанлар ишонғанларни енга олмаслар»⁸.

Дилнавоз. Кучимиз борми дерсан?

Рахимбахш. Тўрт юз милийун ҳинд улуси куч эмасми?

Дилнавоз. Уни куч санағанда бутун мусулмон дунёси ҳам англизга қарши бир куч бўлса керак.

Рахимбахш. Албатта.

Дилнавоз. Бундай кучга ишонмоқ янглишдир.

Рахимбахш. Нега?!

Дилнавоз. Раҳимбахш тушун. Англизга қарши бир куч деганинг ҳинд улусини-да, мусулмон дунёсини-да кўз олдига келтириб қара. Нималар қўрасан: кишига ўшаган бир йигин жонли нарсалар. Миялари томуғ⁹ пучмоғ¹⁰ ла-риндан қоронғуроқ. Кўзлари оёқ остидан нарироқни кўрмайдир. Юзлари кейинга қайтған, тулаш, кейинга қарайлар. Жон озугин, кўз ёруғин кейиндан ахтаралар. Олға босмоқ келгусини ўйламоқни «куфр» деб биларлар. Миялари эски, тушунчалари эски, қарашлари, қилиқлари эски. Эскиликка топиналар. Энг буюк кишилари — ўлик. Энг тўғрили ерлари — мозор. Яшамоққа топиналар. Одамларча яшамоқ йўлини ахтармайлар. Бутун дунё буларни таламоқ учун бирлашган экан, бунлар таловдан кутулмоқ учун бирлашмайлар. Мусулмон дунёси нари турсун, бу кун ҳинд инқиlobчилари орасинда ҳам «бирлик», «келишув» деган нарсалар йўқ... Бундай бир кучга ишонмоқни қўябер, бундай бир йифинга «куч» демак бўшдир.

Рахимбахш. Бунча умидсизланма. Улусимиз зулм остиндадир, бирлашмаги қийин эмас. Зулм мазлумларни бирлаштироқ учун энг буюк бир қуролдир.

Дилнавоз (узоққа қараб). У ким?

Рахимбахш. Ким? (Бошини кўтариб қарап.) Лолаҳардиёл.

Дилнавоз. Шу киши тўғрисинда нима дейсан?!

Рахимбахш. Буюkdir.

Дилнавоз. Шунга юракдан хурматим бор.

Рахимбахш. Хурматга арзийдир.

Дилнавоз. Ўзи эса мажус¹¹.

Рахимбахш. Инсонлиқ мажуслиқ ё мусулмонлиқға қарамайдир. Лолаҳардиёл инсондир.

Дилнавоз (йўлга қараб). Мана келди.

Рахимбахш қарап. Лолаҳардиёл келар. Иккаласи-да ериндан қўпар¹².

Лола. Нешлаб турасиз, ушоқлар?!¹³

Рахимбахш. Шундай, дардлашиб турамиз.

Л о л а . Бир-бирига яқын икки юракнинг дардлашмаги учун мана шундай тип-тинч ерлар керак.

Д и л на в о з . Табиат кўринишларини тамоша қиласиз, бобо.

Л о л а . Севишган икки юракнинг мана шундай баҳор қучоқларинда тинглашмоқлари тамошаларнинг энг буюгидир.

Дилнавоз уялур.

Уялма қизим. Севишмак уят эмас. Юрак юрак экан, севмак севилмак истар. Севгусиз қолған юрак, сувсиз қолған балиқ кабидир. Унинг ҳар тебраниши бир жон чекишидир. Ер юзини тўлдириған бўш жанжаллардан, олдамчилик негизига қурилған келишмакликлардан, гараз қотишған бирликлардан, ҳасад уруғин маҳташлардан йироқлашибисиз. Табиатнинг тип-тинч кўринишлари орасинда турибисиз. Юракларингиздангина кўпуб чиқған сўзларингизни тинглашасиз. Бу оз бир саодат эмас. Кутли бўлсун сизга. (*Бир оз тинар, ўйлар. Қўлларини иккаласининг умузларига¹⁴ қўйиб, саҳнанинг ёқасига келтурур. Иккаласига ҳам турғанча қарағандан кейин, оғир-оғир сўйлар.*)

Ушоқлар! Сизнинг бу ҳолингизни саодат дедим ҳам кутладим. Олданмангиз. Бундай бир саодат сизда келган бўлса ҳам, ўзин сўрмас. Дунёнинг турли қайгулариндан, турли сезгулариндан айрилиб, бундай тип-тинч ерларда жимжит ўтурмоқ қийиндир. Тириклик тебраниш демакдир. Турғунлиқ эса ўлимдир. Ернинг, кўкнинг, юлдузлар билан күёшнинг борлиқлари тебраниш узра қурилғандир. Тебранмагач, буларнинг бари йўқдир. Турон сандугочларимиз¹⁵ шу тоғлар булутлар каби югурмакдадирлар. Бутун дунё тебранар экан, сизнинг тебранмай туришингиз бўлурму? Тирик экансиз, тебранурсиз. Тебранмас экансиз, ўлурсиз. (*Қатмиқ.*) Юртимиз ёниб турадир. Улуси(ми)з эзилиб битди, эшиласизми?

Бу кун бу ўлқадан қўйдан ортиқ одам кесиладир. Омонлиқ, тинчлик, эрк деган нарсаларни кимса билмайдир. Масжидда намоз учун йигилғанлар «сиёсий йигин» ясаған бўлиб, тўпға боғланар. Эр билан хотун ўзаро кўбрек гапургандага ҳукуматга қаршу бўлиб дорга осилалар. Бу кун устидангина шу ўлқага қарағанда, йиқилған шаҳарлар, ёндирилған қишлоқлар, таланган ўйлар, кесилған бошлар, осилған гавдалар, тўкилған қонлардан бошқа бир нарса кўрмаймиз. Яқиндан танишмоқ учун ичкарироқ киргандан,

қочирилған қизлар, пардасизланган хотунлар, бир-бирининг этини еган очлар, хўрлиқ кўрган буюклар, сўкиш эшишган бошлиқларнинг қонли ёшлари, мунгли бошлари, тутунли оҳлари, ўтли инграшлари олдимиздан ясов тортиб ўтадир.

Шу қип-қизил гуллар юртимизнинг қон йиглаған кўзларидир — сиздан иш кутадир. Шу ям-яшил оғочлар улусимизнинг ўлими учун тикилған мотам белгиларидир — сиздан кўмак тилайдир. Шу кичкина булбул ҳам жон чекишигандан кимсасизларимизнинг марсиясини айтадир. Сизнинг қонларингизни қайнатмоқчи... Шунлар орасинда тинч турмоқ сафана бошида чоғир¹⁶ ичмакка ўхшайдир, ярашмайдир. Шуларнинг кўмагига эришмоқ учун ишга киришингиз, тебранингиз. Тебранмас экансиз, ўлимингизни кутингиз. (*Иккаласига қарағандан кейин.*) Қайғуртдим сизни. (*Кеммоқчи бўлиб қўлларини уларнинг умузларидан олар.*)

Д и л на в о з (ҳолсизча). Туриңгиз!

Р а ҳ и м б а х ш . Кетмангиз!

Л о л а . Етар энди, соғ бўлингиз! (*Чекилиб илдам чиқар.*)

Д и л на в о з (ҳолсизланган). Уф...

Р а ҳ и м б а х ш . Сенга нима бўлди, гулим?

Д и л на в о з . Менга бир оғирлиқ келди. Ўтирайлиқ. (*Ўтира бошлар.*)

Р а ҳ и м б а х ш . Ўтири, малагим. (*Иккиси-да ўтирурлар.*) Нима бўлди? Нега оғирлашдинг?

Д и л на в о з . Лоланинг ўткир тилидан чиққан сўзлари юрагимни қоп-қора тутунга чулғатди.

Р а ҳ и м б а х ш . Лоланинг сўзларида юракни қора қилгучи нарса йўқ эди-ку.

Д и л на в о з . Бор эди ҳам кўб эди.

Р а ҳ и м б а х ш . Мен эшиштадимми?

Д и л на в о з . Эшиштинг, англадинг. (*Юзига қараб.*) Боқ менгизинг¹⁷ сарғайиб қолмиш. Руҳинг қийналғандир. Мендан яшунтурасан.

Р а ҳ и м б а х ш . Ишон, малагим. Лоланинг сўзларинда қўрқинчли бир нарса йўқ эди. У бўлиб турған ишларни кўрсатди. Сизнинг бошингизга ҳам шунлар кёлгусидир, деди.

Д и л на в о з . Йўқ, йўқ. У бизга кўб нарсани онглатмоқчи бўлди ҳамда онглатди. Ҳиндистонда бўлиб турған ишларни кўрсатди. Сизнинг бошингизга ҳам шунлар кёлгусидир, деди.

Р а ҳ и м б а х ш . Ўтинаман, ўзингни тетик тут.

Дилнавоз (*юрагини тутиб*). Уф-ф... эзилдим... Лола
нелар сўйлади?!

Рахимбахш. Тангри учун, кўй шу сўзларни!...

Дилнавоз. Унинг сўзлари тубсиз эмас. У билмасдан
сўйламайдир.

Рахимбахш. У бир нарса сўйламади.

Дилнавоз. Сўйлади, кўб нарса сўйлади.

Рахимбахш (*узоққа қараб*). Улар ким?

Дилнавоз (*ўзини йигиштириб*). Ким келди?!

Рахимбахш. Қишлоқлилардан икки киши эмиш.
Экин бошига боралар.

Дилнавоз. Киши шулардай баҳтли бўлса...

Рахимбахш. Кимса булардек баҳтсиз бўлмагай.

Дилнавоз. Қиладигон бутун ишлари кишилик дунё-
сини тўйдирмоқ учун...

Рахимбахш. Унларнинг бутун емиши кишилик дунё-
сининг ёвларига борадир. Бояқишилар кишилик дунёсини
эмас, ўзларини ҳам тўйдира олмайдилар. Оҳ, шу баҳтсиз-
лар учун-да қутулиш куни бормукин?!

Икки экинчи¹⁸ келар. Бири қари, бири ўрта ёшли. Ўрта ёшлигининг
умузи узра бир кетмон.

Қари. Салом алайкум... эсонмисиз, Раҳимбахш соҳиб?
Дилнавоз биби-ку. Соғмисан, қизим?

Дилнавоз. Эсонмисиз, бобо?

Рахимбахш. Ҳормагайлар!

Қари. Бор бўлғайлар, йигитларим!

Рахимбахш. Қани, қаердан?

Ўрта ёшли. Сув бошида эдик, ерларни сугордик.
(*Кўкламликка тамоша кўзи кездириб*.) Қандай яхши ўрин
топиб ўтирибсиз?

Рахимбахш. Нима қиласайлик... қани буюрингиз. Ўту-
ришайлик.

Ўрта ёшли. Хўш, биз кетайлик. Чарчаб қолдик.

Қари (*йўлдошига*). Жоним, чарчаб қолдик дейсан, яна
кетмоқчи бўласан. Кишининг жонини оласанми? Бир оз
ўтуриб кетсанг, на бўлур?

Ўрта ёшли. Яна сенинг лақмалиғинг тутди. Ҳайдা,
ўтирайлик. (*Кетмонини олдига қўйиб ўтирас*.)

Рахимбахш. Ўтурингиз бир оз.

Қари. Ё пиrim-е! (*Ўтирас*) Дилнавоз, қизим, қалай-
сан?

Дилнавоз. Шукур, бобо!

Қари. Оғанг қаерда?

Дилнавоз. Кеча шаҳарга кетган эди.

Қари. Тангри ёрлақасин, отанг кўб яхши ўртоғимиз
эди. Худди шу ерларда соатлаб гапурушуб ўтурадир эдик. Ун-
даги тиниқ юрак, очиқ юз, тотли сўз кимсада бўлмас.

Рахимбахш (*Дилнавознинг кўз ёшларини артғанини
кўргач*). Нима хабарлар бор дунёда, ота?

Қари. Ҳеч хабар йўқ-ку.

Ўрта ёшли. Уткан кун шаҳарга оғалиқникига бор-
ған эдим. Уч-тўрт киши гапурууб турған экан, қизиқ-қизиқ
нарсалар сўйладилар.

Рахимбахш. Нелар айтдилар, қани?

Ўрта ёшли. Билмам, ким деган бор экан. Укаси билан
Олмониядан кўб ақча олиб келган экан. Булар Бофистонда
турар эканлар. Тилаклари Ҳиндистонни кутқармоқ экан. Бофистонда
босмахонаси бор экан. Лоҳурда бир дориҳона
очган эканлар. Улусга текин эм¹⁹ бера эканлар, ишлари кўб...

Қари (*унинг сўзини кесиб*). Кўй!... «Эканлар, эканлар»,
деб жонимни чиқардинг. Бу эканлар-меканлардан кўб эшиг-
дик.

Ўрта ёшли. Нега қўймайсан. Эшигтанимни айтай-
чи. Бизнинг Раҳимбахш соҳиб ҳам шул Фарангистонларда
юриб ўқиди. Қани шу сўзлардан нима англайдир?

Қари. Бай-бай, эшигтанинг бор экан-да! Мен кички-
нагина чақалоқ эдим, шул сўзларни эшитар эдим: «Унлар
бор экан, бунлар йўқ экан, унлар борған экан, шунлар
келган экан». Қулқларим шу экан-мекандан тўлған эди.
Бу кун олтмишга кирибмен, эшитиб турғаним яна шу.

Ўрта ёшли. Нима бўлсинг, қани??

Қари. Ўзимиз белларимизни етти ердан боғлаб (*кет-
монини кўтариб*). мана шу билан унинг бошини эзмасак,
ҳеч ким ташқаридан келиб бизни кутқармас. (*Кетмонни
қўйиб*.) Бу нима гап, жонимиз чиқди. Тинчлик деган нар-
санни унутиб қолдик. Эрта-кеча борлиғимизга ҳеч биримиз
ҳеч биримизнинг кўнгли тўлмайдир. Бундай тириқчилик-
ни нима кераклиги бор? Чиқайлик, ёпишайлик. Ўлиб ке-
тайлик, ё ўлдириб битирайлик. Бошқа чора йўқ. (*Йўлга
қараб*.) Мана биттаси келди.

Ҳаммалари қаарлар.

Ўрта ёшли. Битта эмас, тўртта.

Қари. Ҳамда отли.

Рахимбахш. Булар ким?

Қари. Ким бўлур? Англиз оғайниларимиз-да.

Дилнавоз. Бу ёққа келмагайлар. Отларини сақлайдилар.

Ўрта ёшли. Отдан тушдилар-ку! Бизгами ишлари бор?! Отларини қантардилар.

Раҳимбахш. Шу ёққа келадир. (*Экинчиларга*) Сизлар туриб шу оралиқ билан кетингиз, тўрттамизни бир ерда кўрганда, ҳукуматга қаршу яшурин кенгашасиз, деб тутарлар.

Дилнавоз шу ёққа қараб турар.

Ўрта ёшли. Бу кетмонни кўрса, куним битди. Ёшурин кенгашимиз яроқли ҳам бўлур.

Қарি. Кетсак, баримиз кетамиз.

Раҳимбахш. Бу ерда киши ўтирганини кўрдилар. Баримиз кетсак, кетимиздан қуварлар.

Қарি. Биз сизни кўйуб кетмаймиз. Нима бўлса, бўла берсин. Сиз кетингиз, биз турайлик.

Раҳимбахш. Ўтинамен, кетингиз. Сиз ботроқ қочсангиз, биз ҳам қутуламиз.

Ўрта ёшли. Майли. Ундей бўлса кетайлик. (*Кетменини олур*.)

Қарি. Ҳай.

Иккаласи-да ярим қўпубфина ўзларини паналикка олурлар.

Дилнавоз. Биз ҳам кетсак-чи!

Раҳимбахш. Баримизнинг кетишимиз яхши эмас.

Дилнавоз. Нега?!

Раҳимбахш. Орқамиздан қуварлар.

Дилнавоз. Нега қуварлар?!

Раҳимбахш. Онлар негани билмайлар.

Дилнавоз. Нечун унларни қўйиб биз кетмадик?

Раҳимбахш. Кетмонлари бор эди. Яроқ ташиған бўлуб қўйналар эдилар.

Дилнавоз. Кетмон яроқми?!

Раҳимбахш. Уларга қаршу тирноғимиз-да яроқдир.

Дилнавоз (секингина). Мана келди.

Раҳимбахш. Кўрқма.

Бир оздан кейин юзбоши Ўкунар уч пўлис билан келар.

Ўкунар (Дилнавозни кўргач, ўйлар). Оҳ... бу ерда экан, бироқ бу йигит ким?! (*Сўйлар*.) Кимсиз! Бу ерда нешлаб турасиз?

Дилнавоз билан Раҳимбахш турарлар.

Раҳимбахш. Биз шу қишлоқдан, шунда гапуруб тушибмиз.

Ўкунар. Ҳукумат ёшурун ерларда йифилмоқни қаталон қилған, онглаганингиз йўқми?!

Раҳимбахш. Биз бир қишлоқнинг болалари, бирбиримизга қўшни. Уйда, далада, экин бошида, сув ёқасинча, ҳар ерда ўтурууб гаплашамиз. Бизнинг ўтурушумиз ёшун-да эмас, ҳукуматга заарли-да эмас.

Ўкунар. Заарли эмас?! Ҳукуматнинг буйругина қаршу турасизми?! (*Пўлисларга*.) Тутингиз буларни.

Пўлислар иккаласини ҳам тутар.

Раҳимбахш. Бизни нега тутасиз?!

Ўкунар (бир пўлислага). Сен бу йигитни қишлоқ қорууллиғига элтиб топшур, шаҳардан сўралганча қамаб ўйсин. (*Қолған икки пўлислага*.) Сиз бу қизни отингизга минирингиз, шаҳарга элтасиз.

Пўлислар уларни ҳайдаб чиқарлар.

Дилнавоз. Йўқ... мен ёлғуз бормам. Нима қилсангиз, иккимизни қилингиз!...

Пўлис. Юр... (*Силтаб юргузар*.)

Раҳимбахш (чиқарда). Юзбоши! Шу ишни ҳам қонун юзасидан қиласизми?

Пўлис. Кўп гапурма... (*Силтар*.)

Бариси чиқарлар.

Парда тушар

ИККИНЧИ ПАРДА

Кундуз. Бўнир кўрғонида Мавлоно Нўъмоннинг уйи. Уй шарқ йўсунили ясалган. Этагида буюк Эрон ҳолилари²⁰ ёйилған. Деволларига арабча ёзувили лавҳалар, эски қиличлар, ўнбиротар англиз милтиқлари, тўппончалар осилған. Тўрдаги бир арслон терисинда Мавлоно Нўъмон оқсалла, қора жўя кийиб ўтирган. Қўлинда сариф қофозли бир газет ўқийдир.

Мавлоно Нўъмон (газетни қўйиб). Қизиқ кунлар бўлиб қолди. Киши ўз фойдасининг қаёнда бўлғанини кесдурма қилиб била олмайдир. Бу Абдусуббухлар Олмониядан келиб ишга киришдилар. Ишлари ҳам ёмон эмас каби, бизга ваъдалар берарлар. Ҳиндистонни англизлардан кут-

қарғач, ишни мусулмонларга топшурмиз, дейлар. Бизга ҳам катта бир ҳұкумат ици топшурмоққа сүз берарлар. Аңчамунча суюргол бердилар; биз ҳам буларнинг сўзига ишониб, кўмак бериб турамиз. Буларга ишонғанимиз ҳам тузук. Олмония катта бир давлат. Халифат-ул-муслимин²¹ ҳам шу билан бирлашган. Энди албатта бир иш қиласа керак. Бу кофири кута-кута кўзимизнинг ёруғи қолмади! Абдусуббухон эса ҳар кун «ана олмонлар бу ерга келмишлар, мана турклар у ерга келмишлар», деб бизга умид берадир. Бу газетта қарағанды, иш бутунлай бошқа: турклар Қафқазияда енгилиб ташланғанлар... Бу хабар тўғри чиқғач, бизнинг ишимиш ёмон! Бироқ имонимизнинг ёқасини бу газетта топшуруб-да бўлмайдир, бир ерда туркнинг енгилғанин ёзған экан, иккинчи ерда Олмониянинг ўн тош йўлни уратурған тўплар ясағанини сўйладайдир. Бунинг қайсисига ишонамиш? Қафқазияда англиз енгишган: ишимиш ёмон. Олмония кўб катта тўплар ясаған: ишимиш яхши... Урушни булар қиладир, орада шошиб қолған — биз. Тангри шуларнинг иккисини ҳам йўқ қилиб, Имом Маҳди²² каби соҳиб-қирон бир мусулмон еткурса...

Шу Абдусуббухонлар-қу онгсиз кишилар эмаслар. Шулар Олмонияга ишониб, шунча ишлаб турғандан кейин, биз ҳам бир оз кутсак, яхши бўлур...

Фулом Наби кирап. Қўлинда сарик қофозли, тош босма, ўрта қатлӣ, тўрт бетли бир газет.

Мавлоно. Кел, нима кетурдинг?!

Фулом Наби. «Ал-Халил» газети²³. Мавлавий соҳиб юбормишлар.

Мавлоно. Кетур, қани? (Фулом Наби газетни бериб чиқар. Мавлоно газетнинг биринчи бетинда ёзилған бир хабарга эс қўйиб ўқигандан кейин.) Мана... мен демадимми? Англизга қаршу ишламоқ қулай эмас. Турклар Ироқда енгилмишлар. Басра шаҳрини англиз олмиш. Англиз тангрининг балоси. Нима қиласамиз. Кофир бўлса ҳам, тангри шунга яхши қараған эди. Абдусуббухон тентак бир киши, бунинг сўзига қараб, ишлаб бўлмайдир. (Газетнинг иккинчи бетидаги бир хабарни эс қўйиб ўқигандан кейин.) Мана... Иш яна бузулди! Олмония учичлари Лондонга бўмба ташлағанлар. Бу кофири газети кучи бўлмаса, англизнинг пойтахтига бўмба ташларми? Олмония кучли экан, яна бир оз қўнмак керак.

Фулом Наби кирап.

Мавлоно. Нима гап?!

Фулом Наби. Соҳиб! Бир киши келмиш. Сизни кўрмакчи.

Мавлоно. Келсун.

Фулом Наби чиқар.

Яна Олмониядаги киши келди?!

Марлинг. Оврупача эски бир кийим кийган, ҳиндистонча кўк бир салла ўраган, бош этигб салом деб кирап.

Мавлоно. Буюрингиз, ваалайкум ассалом. (Er кўрсатур. Марлинг ўтурур.) Қайдан келасиз?

Марлинг. Амратсардан²⁴ келамен, соҳиб.

Мавлоно. Қаёнға?

Марлинг. Жанобингизни кўрмак учун.

Мавлоно. Хуш келдингиз.

Марлинг. Буюргайсиз, кимсанни ичкарига қўймасунлар.

Мавлоно (эшикка қараб). Фулом Наби! Фулом Наби! Фулом Наби (келиб). Лаббай!

Мавлоно. Бизнинг бир оз ишимиш бор. Ичкарига киши қўйма!

Фулом Наби. Хўб. (Чиқар.)

Мавлоно. Қани, буюрингиз!

Марлинг. Мени Войис Рой ҳазратларининг буйруклари билан Амратсар шаҳрининг пўлис комиссори юбордилар.

Мавлоно. Отингиз нима?

Марлинг. Марлинг.

Мавлоно. Англизмисиз?!

Марлинг. Ҳа, соҳиб.

Мавлоно. Кўб яхши. Хуш келибсиз. Бизга қандай хизмат?!

Марлинг (кўйл чўнтағиндан қоплари олтунли, инжули бир Куръон чиқариб ўтгандан кейин). Куръони шариф. Войис Рой ҳазратлари сизга армуғон юбордилар.

Куръон ҳурматига иргиб турар. Марлинг ҳам Мавлононинг турғанин кўргач, турар. Мавлоно Куръонни олиб ўпид, кўзларига суртгандан кейин ўтуруб, Куръонни ястиғи узра қўяр. Марлинг ҳам ўтурур.

Мавлоно. Хўш, тағин нима гап бор?

Марлинг. Войис Рой ҳазратлари сизга салом айтдилар.

Мавлоно. Эсон бўлгайлар.

Марлинг. Ҳинд мусулмонларининг баҳти йўлинда тиришганингизни бутун англизлар яхши билганлар.

Мавлоно. Уни тангри билгай.

Марлинг. Ҳиндустандаги шу ерга кўчиб келган мусулмонларнинг бошлиги бу кун жанобингиз?

Мавлоно. Ҳа.

Марлинг. Шундаги мусулмонлар учун унумли бир иш бор.

Мавлоно. Биз ҳам шуни истаймиз.

Марлинг. Ёлғиз булар учун эмас, бутун ҳинд мусулмонлариға унумли.

Мавлоно. Нима экан, қани??

Марлинг. Биласизким, англиз улусининг ҳиндга келганликлари ҳиндлilarни етуштирмак, маданий қилмоқ учун эди.

Мавлоно (кудумсаб). Билами!

Марлинг. Биз келмасдан бурун Ҳиндустан дин жанжаллари, мазҳаб фавғолари, қорин-курсоқ урушлари билан тўлған эди.

Мавлоно. Тўгри.

Марлинг. Бир мусулмон қурбон байраминда ҳўқиз сўйганда бутун ҳиндилар сизга қаршу яроқланиб чиқар эдилар, бир ҳинди мусулмон намозига кирғач, сиз ҳам уруш очар эдингиз.

Мавлоно. Тузук.

Марлинг. Бу жанжаллар ҳинди билан мусулмон орасиндафина эмас, мусулмонларнинг ўзаро, ҳиндлilarнингда ўзаро қонли жанжаллари кўб эди.

Мавлоно. Тузук!

Марлинг. Дея оламизким, ҳиндлilarнинг бошлирига бизни келтурған ораларингдаги шул бузуқликдир.

Мавлоно. Аниқ.

Марлинг. Биз келгач, мана шул бузуқликларни тузатдик! Жанжалларни кўтартурдик, маданий яшамоқ йўллари ни кўрсатдик. Ҳиндлilarни ўқитдик-да... Бу кун шодлиқ ила кўрамизким, ҳиндлilar яшамоқ йўлларини билиб олмишлар, яшамоқ учун тайёрланмишлар. Биз Ҳиндустанни адолат билан олдиқ, адолат билан сақладик. Яна адолат билан ўзингизга қайтармоқчи бўламиз. Биз ишонамизким, бу кун Ҳиндустан ўз эркини олғач, бурунги ёввойилиқларини, ёвузлиқларини қилмас. — Бироқ... шу паллада биз бошқа бир нарсани ўйлаб турамиз... (бир оз тинар.)

Мавлоно (бутун руҳи билан). Нима ўйлайсиз?

Марлинг. Эски Ҳиндустан маданиятининг туб эгаси мусулмонлар эдилар. Шу паллада ҳам Ҳиндустанонда энг яхши тайёрланган улус мусулмон улусидир. Биз истар эдикким, бутун ҳинд ҳукуматини мусулмонларга топширайлик.

Мавлоно. Албатта шундай бўлсун-да, буни ким истамас??

Марлинг. Биласизким, Ҳиндустанда кўбчилик мусулмонлар-да эмас. Ҳиндлilar, сакхийлар²⁵, мажуслар бирлашиб ҳукуматни ўз қўллариға олмоқчи бўлсалар, нима қиламиз?

Мавлоно. Бундай қилмасалар керак.

Марлинг. Қилсалар нима деймиз?

Мавлоно. Йўқ... қилмаслар. Сиз қўрқмангиз.

Марлинг. Соҳиб! Меним «қилмасалар»ингиз келгуси кунлар учундир, бу кунгача қилған бўлсалар нима бўлур?

Мавлоно. Бу кунгача қилған бўлса эдилар...

Марлинг. Сизга онглата эдиларми?!

Мавлоно. Улар онглатмагандা ҳам, ўзимиз онглар эдик.

Марлинг. Мана, онглаб турубсиз-ку, соҳиб!

Мавлоно. Нима... улар мусулмонларға қаршу бирлашиб диларми?

Марлинг. Бирлашибдилар. Шу тилакларни катта бир давлатга ҳам билдурдилар.

Мавлоно. Англиз давлатигами?

Марлинг. Йўқ, бизга айтмайдилар. Ҳаммалари биларларким, биз мусулмонларни ёқлаймиз.

Мавлоно. Кимга билдурдилар?

Марлинг. Олмонияга билдурдилар, бироқ...

Мавлоно (сўзин кесиб). Қайтарғандир, албатта.

Марлинг. Қайтарди, негаким...

Мавлоно (сўзин кесиб). Албатта, шундай қилиши керак. Туркиянинг дўсти бўлғанидан кейин мусулмонларни ёқламаса бўлурми?

Марлинг. Соҳиб! Гап унда эмас... Олмония давлати бутун ер юзини ўзиники қилмоқчи, ҳеч бир ерни сизга ҳам, уларга ҳам бермак истамас.

Мавлоно. Туркияни юз кўрмасми?

Марлинг. Қўлидан келса Туркияни ҳам ўзиники қилиб қўяр.

Мавлоно. Кизиқ... ажиб... хүш, биз энди нима қиласиз?!

Марлинг. Бу күн ҳинд мусулмонларини иккى олбости күркүтиб турадир. Биринчиси Олмония, иккинчиси мусулмон бўлмаған ҳиндлilar. Биз мана шу иккى олбостидан сизни бутунлай кутқариб, Ҳиндустонни ўзингизга топшурмиз. Шунинг учун Олмонияни битурганимизгача, Ҳиндустон мусулмонларининг бизга кўмаклари тейиш. Биз Олмонияни битиргандан кейин Ҳиндустонни мусулмонларга топшурамиз десак, кимса бизга гаптура олмас. Меним сизга келишим шунинг учундир.

Мавлоно (бир оз ўйлагандан сўнг). Ҳинд мусулмонларининг ўз бошлиқлари бор. Биз бир чеккада ўтирган киши. Бизнинг қўлимидан нима келар?

Марлинг. Буюк бир ишни битирмак учун, дардли кишиларга керакдирким, биргалашиб ишлашсунлар. Ҳиндустонни ўз қўлингизга олмоқ учун, ҳар бир мусулмоннинг тиришмаги тейиш.

Мавлоно. Хўш, биздан қандай кўмак кутасиз?

Марлинг. Ҳиндлilarни бизга қаршу оёқлантиromoқ учун шу ерларгача Олмония агентлари келган.

Мавлоно. Ким экан улар??

Марлинг. Абдусубух билан йўлдошлари.

Мавлоно (бир оз телбача). Улар олмон агенти эмаслар!

Марлинг. Соҳиб! Олмон агенти бўлганлари аниқ. Биз яхши биламиз.

Мавлоно. Бизга айтмадилар-ку!

Марлинг. Албатта... Сизга айтсалар, уларни бу ерга кўярсизми?

Мавлоно. Хўш, нима қиласиз энди?

Марлинг. Мана шуларни тутиб, Ҳиндустонга юборгайсиз, деган эдик. Давлатимиз сизга ўн минг рупи ойлик кесди. Икки ойлигини мен билан юборди. Бу кечада кетуруб топшурмэн.

Мавлоно (теран ўйлагандан кейин). Мен уларни тутиб, сизга бера олмам.

Марлинг. Нечун соҳиб?!

Мавлоно. Ҳиндустонлilarнинг давлатингизга қанча душман бўлганлиқларини биласиз. Мен бу кишиларни тутиб сизга берсам, эл мени тилим-тилим қиласиз!

Марлинг. Ундай бўлса, шуларни шу ерда ўлдуртмак йўлини топингиз.

Мавлоно. Бу ҳам бўлмайдир.

Марлинг. Нима қиласиз, соҳиб?! Шу тўғрида фойдали бир иш қиласизми?!

Мавлоно. Бу тўғрида меним сизга кўмагим шундай бўла олурким, айтганингиз кишиларни Бўнир кўрғонидан чиқарурмен. Бунда ишламасунлар, бошқасини қила олмам.

Марлинг. Соҳиб! Бу тўғрида нима қилсангиз, унуми ўз мусулмонларингизга бўлур.

Мавлоно. Шу паллада шундан бошқасини қила олмаймен.

Марлинг. Хўп, шуни қиласизми? -

Мавлоно. Қиласмен.

Марлинг. Қачон?

Мавлоно. Яқинда бўлур... Урушлар қандай борадир, хабарингиз борми?

Марлинг. Уруш кўб яхши, ҳозир Америка ҳам бизга кўшилди.

Мавлоно. Кўб яхши.

Марлинг. Соҳиб, ўтинаман: Войис Рой ҳазратларининг сўзлари ерда қолмагай.

Мавлоно. Мен шу кундан ишга киришамен.

Марлинг. Соҳиб мен энди кетайин. Бу кечада яна хизматингизга келарман. Соҳиб, ишониб қолғайсизким, англиз давлати сизнинг яхшилигингизни сира унутмас. (*Ердан турар.*)

Мавлоно. Қайтасизми?

Марлинг. Ҳозир қайтайин, соҳиб. Яна кечада хизматга келурмен.

Мавлоно (ўтирган жойидан). Тузук.

Марлинг (букулиб). Ҳай... соҳиб, яхши қолингиз.

Мавлоно. Ҳай. Яхши борингиз. (*Марлинг кетар. Мавлоно Қурбонни олиб, у ёқ-бу ёқига қараб, яна ерга қўйгандан кейин, бошини қўмирлатур.*) «Ки аз савдои, на хато, на хат бўйи мушки май ояд»²⁶. Олмонлар иккى ойлик йўлда, англиз бўлса мана тумшуғимизнинг тагида турубдир. Йўқ Олмония учун бор англиздан айрилмоқ тўғри сиёсат эмас. Эмди «худойҳиззаму мажал»²⁷, шул англизни бизга катта қилгандан кейин... «эл хайру масаналлоҳ»-да²⁸. Шу билан келишиб ишлаш яхши-да...

Фулом Наби кирап.

Фулом Наби. Соҳиблар келдилар.

Мавлоно (*Куръонни газетга ўраб қўйгандан сўнг*). Келсунлар. (*Гулом Наби чиқар*.) Энди бунларга қандай онглатамиз?!

Абдусуббуҳон, Файз Аҳмадхон, Бадринат, Диинанат, Орномсингх соҳиблар бирар-бирав салом бериб киарлар. Мавлоно Нўймон ердан қўпіб, булаңи қаршу олгандан кейин, ҳаммалари ўтуурлар.

Абдусуббух. Мавлоно соҳиб! Меърожи шариф?!²⁹

Мавлоно. Алҳамдуллилоҳ. Сиздан сўрайлик?..

Абдусуббух. Яхши.

Мавлоно. Янги хабарлар йўқми?

Абдусуббух. Тунов кунги хабарлар. Бошқаси йўқ!

Мавлоно. Ўз ишларимиз қалай?!

Абдусуббух. Ишларимизнинг бориши яхши. Эмломгимиз³⁰ ишлаб турадир. Дехли шаҳрининг ўзиндагина бир кечада юз минг баённома тарқатганимизни Дехли пўлис комиссари ёздурубдир.

Мавлоно. Юз минг баённома тарқатмоқ — буюк иш. Кўб яхши. Бироқ бу ишдан англизга зарар бўлғанми, йўқми?

Абдусуббух. Зарар бўлмасми дейсиз, бу кун бутун Ҳиндустон қайнаб турар.

Орномсингх. Ҳиндустоннинг ишчиси, савдогари, экинчиси, хуллас, ҳаммаси англизга очиқ душман кесулган.

Бадринат. Шоир билан ёзгучиларимизни демайсизми? Уларнинг ёзғичлариндан ҳарф эмас, оловлар томадир. Оғизлариндан сўз эмас, бўмбалар учар.

Мавлоно. Мен шулардан қўрқаман-да.

Абдусуббух. Нега қўрқасиз?

Мавлоно. Бўш сўзлар билан халқни-да, ўзимизни-да қайнатиб юборамиз. Англизларнинг аччиини келтиргандан кейин, қўлимиздан бир нарса келмаганин кўрамиз.

Диинат (*Мавлонодаги бир ўзгаришдан тонганини кўрсатмасликка тиришиб*). Улар ўтди. Англизлар бўзга аччиғланмоқ билан ҳам ҳеч нима қила олмайлар. Бу қунларда биз уларга аччиғланамиз. Улар бизнинг аччиғимиздан қўрқалар.

Бадринат. Ёмонлардан қўрқмоқ унумсиздир. Улар итга ўхшайдилар. Қочсанг қуввар, кувсанг қопарлар.

Орномсингх. Золим йилонга ўхшайдир, оғзини бол билан ювганда ҳам оғуси кетмас, унинг бошини тош билан эзмак керак.

Мавлоно. Англиздек катта бир давлат билан қурашамиз. «Ундей қиласиз, бундай қиласиз» деймиз, қўлимизда шамол-да³¹ йўқ.

Бадринат. Мавлоно соҳиб! Сизга бир шеър ўқурмен. Панжобли дўктур Иқболнинг³² шеъри. Шоир шуни ўн минг кишилик бир йигноқда ўқуған. Элнинг қонини қайнатған. Йигноқға келган ўн минг киши шул шеърни тинглагандан кейин «ўларимиз эрк учун», деб ҳукумат қўноғига юргурған. Қўлимизда бир нарса бўлмаса эди, ҳукумат у йигноқда шу шеърни ўқутмас эди. Мана шеър:

Эски, чурук дунёмизнинг тартибини билмасдан,
Кеча-кундуз тугунларин санамоқдан ўсондим.

Озодликнинг кўнглимдаги битмас-туганмас ишқи
Ўлим билан йўлдошли... бу дунёдан жўнадим.

Ўлим тинчлик ўлкасининг баҳт тўшалган йўлидир:
Мени алам, қайгу ҳасрат балосиндан қутқарди.
Учратмайин ҳеч бир турли тутқинликға, хўрлиқға,
Олиб борди туппа тўғри Ҳақ тахтининг олдига.
Ҳақ мендан шул еримизнинг ҳолларини сўради:
«Менга ондин тортуқ қилиб нелар кетурдинг?!» деди.
Дедим: «Онда йўқдир сира сенга тортуқ қилғудек
Бир сўз, бир иш, бир нарса!..

Бироқ мен

Бир кичкина шиша ичра бир томчи қон кетурдим,
Кўп баҳоли бир армуғон кетурдим.

Бундай сенинг ҳазинангда, учмоғингда топилмас.
Яратмадинг сира бунинг эшини.

Бу муқаддас қон, эй Ҳақ!

Золимларнинг қиличи-ла эрк, озодлик йўлинда
Шаҳид тушган бир йигитнинг ярасиндан томғандир!
Ол!.. Сақла!

Мана шу шеърни ўқуб, ўн минг кишининг қонини қайнатған шоирға ҳукумат бир нарса демади. Демак, биздан қўрқарлар.

Барчалари эшик сари қараплар. Фазлуллоҳ соҳиб киар.

Фазлуллоҳ (*саломдан кейин*). Сизга баҳоли бир армуғон кетурдим.

Абдусуббух. Нима экан?!

Бадринат: «Бир йигит қони» бўлмағай!
Фазлуллоҳ. Қонли бир йигит.

Абдусуббұх. Қани?

Фазлуллоҳ. Эшикда. Ўзи Лохўрдан қочиб келган экан.

Орномсингх. Тилчи бўлмагай!

Фазлуллоҳ. Эмас. Ўрон берди.

Абдусуббұх. Кетурингиз!

Фазлуллоҳ соҳиб эшикка бориб кўли билан чақирап. Эски меш, кийимлари билан Раҳимбахшон кирап. Буйруқ кутиб, йироқда турар.

Абдусуббұх. Яхши йигит, қаердан?!

Раҳимбахш. Ҳиндустондан.

Абдусуббұх. Қаерга?

Раҳимбахш. Ҳиндустонға.

Абдусуббұх. Отингиз.

Раҳимбахш. Бўмба.

Абдусуббұх. Хуш келдингиз. Ўтириңгиз. (*Раҳимбахш ўтурур.*) Сизники Лохўрданми?

Раҳимбахш. Мен Лохўрдан. Отим Раҳимбахш. Отам хукуматдан қочиб, Вазиристонға ўтган. Ўн йил бурун Вазирий, Масъудий эллари билан Пешовар қўргонига юриш қилганда, шаҳид бўлған.

Бадринат. Мужоҳид³³ ўғли мужоҳид экансиз.

Раҳимбахш. Тўрт йилдан бери «Муслимлик» тўдасига ёзилиб, улус эрки йўлинда тиришаман. Ёввойи англизлар юрагимни ёмон ёрдилар. Кундуз куни босқун қилдилар. Мен билан севгилимин тутқин этдилар, мени қишлоқ қоровулигида қамаб, уни шаҳарга элтдилар. Мен қишлоқ қоровулинда йигирма беш кун ётдим. Қишлоқдагилар кафил бўлиб чиқардилар. Лохўрга бориб севгилимин ахтардим. Пўлис комиссари Ўкунарнинг уйинда қамоқда экан. Кўп тирищдим, кутқара олмадим. Исломия амлоғига кириб, сизнинг сўроғингизни олдим, сизга келдим. Ҳиндустонни кутқармоқ йўлинда тиришмак учун жон берарга тайёрман.

Абдусуббұх. Қишлоқлilar нима фикрда?!

Раҳимбахш. Жонларига теккан. Чиқиш кунин кутиб туралар. Чиқиш куни бўлғач, тиш-тирноқлари билан юрт ёвларини ўлдурмоқчи. Ҳиндли, мусулмон бирлиги кўб яхши борадир. Англизларни тарқатмоқ учун, Ҳиндустонни бирлаштироқ керак. Бу кун қишлоқлilar шунга ишоналар. Шу йўлдан куч берилсун дейлар.

Бадринат. Мен бу йўлда куч эмас, жон берарга-да тайёр.

Абдусуббұх. Ҳиндли билан мусулмонни бирлаштиромак йўлинда нима керак бўлса қилмоқ тейиш.

Мавлоно. Шу фикрга мен қўшила олмам.

Ҳаммаси обдираб³⁴ қарар.

Абдусуббұх. Нечун?!

Мавлоно (*Бадринат, Диинанат, Орномсингхни кўрсатиб*). Бу жанобларнинг аччиғлари келар. Майли, энди мен ўз фикримни айтиб қўяй.

Диинанат. Айтинг-чи?!

Мавлоно (*йўталиб*). Шариатда мусулмон билан ҳиндлининг бирлашмаги тузук эмас, қатағондир. Ҳиндлилар мусулмон бўлмағунча, биз улар билан бирлаша олмаймиз.

Абдусуббұх. Биз зулмга қаршу ҳар ким билан бирлашурмиз.

Мавлоно. Бундай бирлашмак дин олдида қатағондир.

Раҳимбахш. Тўгри..., муллалар динида шундайдир. Икки мазҳаб кишилари нари турсун, иккигина кимсанингда бирлашмаги қатағондир.

Мавлоно. Нечун?!

Раҳимбахш. Эл бирлашса, мулла оч қолур. Шунинг учун!

Мавлоно. Ўғлим! Сиз билмайсиз. Шариат иши ўйин эмас. Англизлар «аҳли китоб»³⁵ бўлалар. Мундайларга «мушрикий»³⁶ дейиладир. «Аҳли китоб» бизга шариат буйруғи билан «мушрик»лардан яқинроқ туралар.

Абдусуббұх. Сиз, муллалар, туташ шундай қиласиз. Ҳиндустонни йилларча эл-аймоқ жанжаллари билан тўлдурдингиз. Улусни етмиш тўрт бўлак қилдингиз. Ҳар бўлакни бошқаларга ёв этдингиз. Ўлкамизни ички жанжаллар билан тўлдирдингиз. Шундай қилиб, англизни ҳам бошимизга келтурдингиз. Юз йиллардан кейин биз ўзимизни кутқармоқ учун бош кўтардик; бирлашдик, қутулмоқ истадик. Яна мазҳаб, дин жанжаллари билан йўлимизни тўсмоқчи бўласиз! Уялингиз, кетингиз, йўқолингиз. Биздан узоқлашингиз. Биз ўз борлиғимизга, ўз эркимизга тирноқ урмоқчи бўлғанларға қаршу чиқурмиз. Қўлға қўл бериб курашамиз. Бизни бу йўлдан сиз-да, мазҳаб-да, динда қайтара олмас.

Бадринат. Мавлоно соҳиб? Сиз кучли бир ишонч билан айтасизким, аҳли китобга қаршу мушриклар билан бирлашмак тузук эмас.

Мавлоно . Албатта.

Бадринат . Ўзингиз кўриб турибсизким...

Мавлоно (сўзини кесиб). Тўхтангиз... тўхтангиз..., мен бу сўзни ўз қопчуғимдан чиқармадим, динимизнинг сўзи шу.

Бадринат . Сиз кўриб турасиз: «мушриқ» деганларингиздан уч киши мана шунда шу мусулмонлар билан орқадошча³⁷ қайнашиб, ишлашиб турубмиз. Сизга ҳам ҳар кимдан ортиқ ҳурмат кўрсатамиз. «Аҳли китоб» бўлган англизлар ҳам шундай қилалармикин? Шунга ишонасизми? Мен айта...

Мавлоно (сўзини кесиб). Бу қиёс маъл фориқ бўлди, ўзингизни уларга қиёс қилмангиз...

Бадринат (қўли билан тўхтатиб.) Мен айтаманким, англизлар сира шундай қилмайлар. Сиз Мавлоно соҳиб ҳаммамизнинг каттамиз бўласиз. Энг тубан англизнинг бўсағасига ўн йил бош қўйингиз, яна сизни уйининг ичига олмас. Тузук, бироз фойда кўрсатсангиз, сизга «Шамусул-уламо», «Хон Баҳодир», «ёс оъи — ъи», «ёс оъи — ди»³⁸ деган мансаблар берар. Бироқ буларнинг куп-куруқ отдан бошқа нарсаси йўқ. Бу мансабларнинг барчасини олсангиз ҳам, энг тубан бир англизга яна тенглаша олмайсиз.

Мавлоно . Сиз ҳаммангиз, меним қўноқларим. Мен сизни ранжита олмайман. Сиз Абдусуббуҳон меним уйимда турғанингизни унугиб шунча қаттиқ гапурдингиз, қаттиқ гапурмак меним кўлимдан ҳам келадир. Бироқ мен айтмам. Шунигина айтиб қўяманким, мен шариатдан чиқа олмам. Аҳли китобга қаршу мушриклар билан бирлашмакни шариат қатағон этган. Шуни сизга билдиридим. Сиз шариатга қаршу ишламасангиз, мен ҳам сиз билан ишлай олмам. Шуни ҳам айта қолайин: шариатга тўғри келмаган ишлар бу кўргонда ҳам бўлмасун.

Дийнат . Сиз бу ишингиз билан ҳинд тарихининг нурли бир бетига қоп-қора тамға босдингиз. Қутли бўлғай!

Мавлоно . Мен дин буйруқларидан чиқа олмам.

Абдусуббуҳон . Кўб сўз тяга юkdir. Бу киши ўз тилакларини билдирилар. Биз-да шу кундан бошлаб бутун ишларимизни бу ердан бошқа ерга кўчирайлик. Турунгиз, орқадошлар.

Турад, ҳаммалари турадлар.

Мавлоно . Абдусуббуҳон соҳиб? Шариатга тўғрилаб ишласангиз, уйим ўз уйингиз.

Абдусуббуҳон . Қуллуқ... хайр эмди.

Мавлоно Нўймондан бошқаси чиқар.

Мавлоно (ёлғиз қолғач). Бир йўла шундан кетсунлар, сўнграси сўнгра. (Эшикка қараб.) Фулом Наби, ҳой Фулом Наби! (Фулом Наби кирап. Мавлоно Қуръонни кўтариб.) Бу кечада қўноғимиз бор! Богчадаги уйни супуриб қўй. Шунда ўтирамиз. (Чиқмоқ учун юрап.)

Фулом Наби . Ҳўб. (Мавлонодан кейин чиқар.)

Парда тушар.

УЧИНЧИ ПАРДА

Кечада Лоҳўрда пўлис бошлиги Ўқунарнинг ўз уйи. Оврупача безангандан Электрик лампалари ёқилған. Богчадаги оғочларнинг ям-яшил бутоқлари деразалардан кираётган. Бир оздан кейин Дилнавоз ички уйдан чиқиб келар. Кийимлари, боёғи, соchlари чирмациқ, боши оғир, менгизи мунгли, қарашлари қайгули, кўз ёшлари курумаган. Секин-секин дераза ёниндаги бир ўриндуқга келиб, ўзини эрксизча ташлар. Бошин бир кўлиға суюб, кўзларини боғчага тикар. Жимжит турар. Бир оздан кейин боғчанинг узоқ пучмоғидан ўтли бир рубоб товуши чиқар. Қайнаганча қайнар. Бир кўйин битирғач, ёниқ бир товуш юксалиб, шу ашулани сайрап («Омон-омон»³⁹ куйинда).

Қоплади қора булут
Гўзал ҳулкарим юзин.
Ажратиб қўйди мендан
Ёруғлиғин ҳам ўзин.
Истамам они қувмоқ
Ҳулкаримни кутқармоқ
Ўзга куч тополмай мен,
Йиқиласман, йиглайман.
Богимни хазон олди,
Сўлди чечагим, қолди.
Чиқғали қаршу унга,
Топилмайдир куч менда.

Кучсизлик, эй, кучсизлик,
Ўртади мени зулминг.
Ниндай қора ўлумдан
Яратилған эрурсен?

Дилнавоз (бошини кўтариб). Оҳ... Эй кўк товуши, тўғри сўйладинг! Дунёда кучсизликдан ёмонроқ нарса йўқ. Бир кишининг кучи бўлмағач, балога қолур: ёзуғлар, жазолар, сўқишилар, сургунлар, қамоқлар, ўлумлар ҳар ёқдан боши узра бало ямфури янглиғ ёғар.

«Хукуматта қаршу кетди» деб отилғанлар, «қон түкди» деб осилғанлар, «ўғрилик этди» деб қамалғанларнинг энг буюк ёзуғлари күчсизлиқdir. Кучлари бўлса эди, бутун шул ёмонлиқларни ишлаб, яна тинч юрар эдилар. Негаким, куч бўлмағанлар ишлаб юралар. (*Бир оз ўйлаб.*) Қишлоқнинг тиб-тинуқ ҳавоси тинчлиғимнинг баҳордан ясалган бешиги эди, ундан чиқарилдим... Тол-бutoқлari дўстлик илдизларидек кўкламлар узра ҳар ён узайған эди. Шуларнинг кўлагасидан айрилдим. Кичкина ариқлари турли тусли гуллар остинда сояда томирлари янглиғ узайған эди, алардан узоқға тушдим.

Раҳимбахш... севдигим... эркам... жоним эди. Борим-йўғим шу эди. Руҳим шу билан яшар, кўнглим шу билан овунар эди, ундан-да йироқлашдим. Уч ойдир, шу уйда қолибман. Ҳамда бир англиз қўлинда! Нечун? Чунки кучим йўқ. Кучсиз бир улуснинг кучсиз бир қизи бўлибман... Битсун кучсизлик!

Бошини қўлга олиб ўйлар. Бир оздан сўнг Родубиби келар.

Роду (*Дилнавознинг ҳолини кўргач, ўйлар*). Бояқиши қиз! Янгигина очилған қайгу чечаги!... Ёвуз Ўкунар бу ўқисизни⁴⁰ ўз юртидан кетурмиш. Кимсасиз қиз уч ойдир ўзи тутқун, номуси қўркувда... (*Сўйлар.*) Дилнавоз, қизим! Бунда нешлаб турасан?

Дилнавоз. Ҳеч...

Роду. Сенинг учун эзгу бир туш кўрдим, қизим!

Дилнавоз. Меним учун эзгулик туш-да!

Роду. Тингламайсанми қизим? (*Дилнавоз жим турур.*) Тушда кўрдим: шу боғчанинг мана шу ёқдағи аргувон оғочининг остида ўтиргансен. Шу кунги каби кучли қайғунг бор. Қарасам, бир сариқ илон охсум⁴¹ бўлди. Сенга сорилмоқ⁴² истади. Катта бир илон эди. Ўлдумракка кучим етмади. Қанча илон дуосин билсан, ҳаммасин ўкуб дам солдим, бўлмади... Худди шу паллада юқоридан қизғин бир товуш эшигдим. Қарасам, уч лочин яшиндек келиб турадир. Лочинлар илоннинг кўзларин ўйдилар. Сени қутқариб, кўтариб кетдилар.

Дилнавоз. Она... мени қутқарғучи лочин ўлумдир.

Роду. Ўлум бир дерлар. Мен уч лочин кўрдим. (*Дилнавоз жим турар. Ташқаридан оёқ товуши келар.*) Мана, сариқ илон келди. (*Дилнавоз қалин қайғу остинда эзилғанлигини кўрсатадурған оғир бир юриш билан иккинчи уйга ки-*

рап. Родубиби унга мунгли-мунгли қарагандан кейин, сўйлар.) Шу ўқисизнинг-да кутулиш кунини кўрсам.

Ўкунар икки англиз юзбоши билан кира: Юзбошилардан бири Пўнтар, бири Порлинсун. Родубиби Пўнтарга бош эгиг туар.

Ўкунар (*келғанларга*). Буюрингиз, ўтирайлик. (*Шапкаларини қўйиб, мосо теграсинда ўтурурлар. Роду чиқар.*) Хуш келдингиз.

Юзбошилар. Эсон бўлингиз.

Порлинсун. Мингбоши ҳазратлари. Богчадағи қарғаларнинг тебранишлари кун сайин кўпайиб борадир. Булар нечун? Чораси нима?

Ўкунар. Нечунлиги билгили. Биз нима қилсак-да, ҳиндустонлилар бизга ишонмайлар. Ишқилиб, бизни бу ўлкан кувмоқ истайлар. Шу тилакка эришмак учун шу кунги ҳолларни ярарлиқ топғанга ўҳшайлар.

Порлинсун. Қандай ҳоллар?

Ўкунар. Ялпи уруш, Олмониянинг енгилмай турushi, Туркиянинг Олмонияга қўшилғани, Ҳиндустонга келган Олмон агентлари...

Порлинсун. Чораси?!

Ўкунар. Раҳмсиз кураш. Бундан бошқа чора йўқ.

Пўнтар. Мингбоши ҳазратлари! Айнуқса, шул олмон агентлари кенгайиб боралар. Юз мингларча қўзғатғу битиклари⁴³ тарқаталар. Бунинг йўлини тўса билмасак, иш ёмон.

Ўкунар. Юзбоши! Бор кучимиз билан тиришмак ҳам ҳар биримизнинг вазифамиздир. Англизлигимизни қўлдан бермайин, тўзим билан, чидам билан тебранайлик.

Порлинсун. Албатта... албатта. Шундай этмак керак, мингбоши ҳазратлари! Қўзғатув битиги тарқатувчи кишиларнинг яшурун ўқлари бордир. Шуни топмоқ керак эди.

Ўкунар. Унинг учун иш кўрулди.

Пўнтар. Ип учи топилдими?

Ўкунар. Топилди.

Порлинсун (*шошқин.*) Топилдими?! Қандай?!

Пўнтар. Излари топилдими? Тутилдиларми?!

Ўкунар. Излари топилди, ўзлари тутилмоқда.

Порлинсун. Шайтонларни туб томирлари билан қурутмоқ керак.

Ўкунар. Қарангиз, қандай бўлди. Бундан ўн кун бурун, эсингизда бордир шаҳарда қўзғатғу битиги тарқатдилар.

Порлинсун. } Бор, бор... биламиз.
Пүнтар.

Үкунар. Бизга келган хабарларга кўра, шулар тар-
қалған кўчаларнинг биринда тонг отардан бурун бир йи-
гит кўрилган. Қора бурутли⁴⁴, калтагина бир йигит.

Юзбошилар эснаб кўярлар.

Порлинсун. Хўш?

Үкунар. Йкки кун бурун Лондон банкасининг боғча-
си ёнида қора бурутли бир йигитнинг икки ишончсиз
киши билан гаплаша турғани кўрулган.

Пүнтар (ўрундинги илгари судрагандек бўлуб). Хўш!

Үкунар. Шаҳримизда «Дуохонаи исломия» деган бир
эмлоқ бор, ҳар кимга оқчасиз «эм» беради. Энг сўнг тунов
куни шул қора бурутли калта йигитнинг шул эмлоқға кир-
гани кўрилган. Мен мана шул эмлоқни босарға кишилар
юбордим.

Пүнтар. Мингбоши ҳазратлари! Йигитни қўйиб, эм-
лоқни босмоқ не учун эди?

Үкунар. Эмлоқдан кейин кўб йигит тутармиз.

Пүнтар. Онглай олмадим, мингбоши ҳазратлари!

Үкунар. Биз кўбдан бери шул эмлоқға ишончсизлик
билин қарап эдик. Шунча катта бир эмлоқ очиб текин эм
бермак, ўзи қизиқ эди.

Пүнтар. У эмлоқ эзгу бир тилак билан очилғанму-
кин!?

Үкунар. Кўб ишлар борким, бошда эзгу бир тилак
билан бўлғандек кўринадир, ахтара бергандан, тагиндан
кўб ёмонлиқлар чиқиб қоладир.

Порлинсун. Тўғри.

Үкунар. Сўнг кунларда хинд газетлари бу эмлоқ тўғри-
сида кўб маҳтаб ёздилар. Маҳташлари орасинда туманли
неча маъноли сўzlар ҳам бор эди. «Мусофири оға»⁴⁵ газети
бир сонинда «Мавлоно Нўймон» деган бир кишини шу
эмлоқға қарши бўлғани учун сўкли.

Мавлоно Нўймон эса бизга билғили англиз дўстидир.

Порлинсун. А-ҳа...

Үкунар. Мана шулар учун биз бу эмлоқнинг кетига
тушган эдик. Ҳалиги йигитнинг шунга кирганин билгач,
босарға қарор бердик.

Порлинсун. Тутдиридингизми?

Үкунар. Кишиларимизни шу кеча юбордик. Яқинда
бир хабар бўлса керак.

Порлинсун. Мингбоши ҳазратлари! Ҳиндли бегим-
ни нима қилдингиз? Ўртоқлаша олдингизми?!

Үкунар. Уни қўй, дўстим! Бизнинг шумлиғимизга
қаранг! Бизга келганда, ҳинднинг қизлари ҳам ихтиолчи
бўлиб қолған.

Порлинсун. Хўш, қани бу киши ҳам ўзгаришими?!

Үкунар. Ўзгаришчи, қўзғолучи ҳаммаси!

Порлинсун. Нима қилди, қани?

Үкунар. Уч ойдан бери тирмашаман. Жонимни олди,
сира бўйинсунмайдир.

Порлинсун. Нима дейдир??

Үкунар. Мени кўрдими, ўзгариб кетадир. Ноҷорлик-
га хуррият, мусовот, адолат, зулм, ёввойилиқ, маданият,
эл-юрт каби қанча маъносиз сўzlар бўлса, ҳаммасини бир-
дан айтиб берадир.

Пүнтар. Маъносиз сўzlарми дедингиз?!

Үкунар. Албатта, бир ҳиндли оғзиндан чиққан бу
сўzlарнинг маъносими бўлур??

Порлинсун (ўйлар). Шу қизни шундан ола билсан...
(Сўйлар.) Ўзлари қаерда??

Үкунар. Шунда, мана шу уйда. Чақираими?

Порлинсун (яширип бир севинч билан.) Ёмон бўлмас.
Шу паллада ташқаридан тўрт кишининг оёқ товуши эшигилур.

Үкунар. Мана, бир хабар бўлди.

Порлинсун. Қизданми?

Үкунар. Йўқ, жоним! Эмлоқдан.

Порлинсун. Ҳа... кечирасиз.

Эшик чертулур.

Үкунар. Кел!

Бир англиз юзбоши кириб салом берар. Қўлинда бир боғлам қофоз
бор.

Үкунар. Ҳормангиз, юзбоши! Неттингиз??

Юзбоши. Буйруғингизни олғач, йўналдим. Ёнимда
ўтгиз пўлис бор эди, эмлоқни айлантуруб олдим. Ўзим икки
киши билан ичкари кирдим. Ўн киши қўлимга тушди. Даф-
тар битикларини бир қопға солиб сургучладим. Яшурун бир
сандуқда мана шу ёзувлар бор экан, буларни олиб келдим.

Үкунар. Ўн киши кимлар экан?

Юзбоши. Бештаси эмлоқда ишлаб турғанлар. Бирта-
си иш бошқарғучи Маҳмудхон. Тўртаси ташқаридан кир-
гандар.

Ү к у н а р . Қаерда булар?

Ю з б о ш и . Шунда тайёр.

Ү к у н а р . Яшангиз, юзбоши. Маҳмудхондан бошқасини қамоқға юборингиз. Буюрингиз, айри-айри уйларга қўйсунлар. Маҳмудхонни бунга келтурингиз. Қоғозларни шунга қўйиб кетингиз.

Юзбоши турар, қоғозларни Ўкунарнинг олдига қўйиб чиқар.

П ў н т а р . Ташқаридан келганларни ҳам қаматасизми?!

Ү к у н а р . Иш шулардан чиқар.

П о р л и н с у н . Биз кетсанк бўлурми?

Ү к у н а р . Қолсангиз-да бўлур.

Юзбоши Маҳмудхонни киргизар.

Ү к у н а р (*Маҳмудхонга катталик билан*). Сизнинг отингиз нима?!

М а ҳ м у д х о н . Маҳмуд.

Ү к у н а р . Қаерли?!

М а ҳ м у д х о н . Ҳинди.

Ү к у н а р . Қайси шаҳардан дедим?!

М а ҳ м у д х о н . Амратсардан.

Ү к у н а р . Лоҳўрга қачон келдингиз?!

М а ҳ м у д х о н . Уч йил бўлди.

Ү к у н а р . Бунда нешладингиз?!

М а ҳ м у д х о н . Шаҳар эмлогинда ишладим.

Ү к у н а р . Ҳали сизни қайдан кетурдилар?!

М а ҳ м у д х о н (*кулимсаб*). Исломия эмлогидан.

Ү к у н а р . Унда нима ишингиз бор эди.

М а ҳ м у д х о н . Олти ой бурун шаҳар эмлогиндан чикған эдим. Бир неча киши билан ўртоқлашиб, шу исломия эмлогини очған эдим.

Ү к у н а р . Ўртоқларингиз кимлар?!

М а ҳ м у д х о н . Биз ўн киши эдик. Воис Рой ҳазратларининг ёрлиқлари билан бу эмлоқни очиб, ҳар кимга текин эм бера келдик. Ўртоқларимнинг отлари, эмлоқнинг тилаги, тарихи. Воис Рой ҳазратлари берган ёрликда ёзилған.

Ү к у н а р . Шу ёрлик қани?!

М а ҳ м у д х о н . Ёрлик эмлоқда.

Ү к у н а р . Элга текин эм бера эдингизми?

М а ҳ м у д х о н . Ҳа...

Ү к у н а р . Эмни Оврупадан текинми олар эдингиз?

М а ҳ м у д х о н . Биз Оврупадан эм истаганлардан эмас-миз.

Ү к у н а р . Қайдан олар эдингиз?!

М а ҳ м у д х о н . Бизнинг бутун нарсаларимиз Ҳиндустондан чиқадир. Бизнинг бутун ишончимиз Ҳиндустондан-дир. Бизча Ҳиндустон ўз бошли, айрича бир дунёдир. Бунда яшаганларнинг бутун керакликлари ўзинда топиладир. Шундан олиш керак.

Икки юзбоши бир-бирига қараплар.

Ү к у н а р (*кулимсаб*). Бўш хаёлчилар...

М а ҳ м у д х о н . Сўзимиз хаёл-да эмас, бўш-да эмас. Бу кун икки кўзи бўлған ҳар ким кўрадирким; Ҳиндустон бу дунё боғчаси, ўзинда бўлғанларнифина эмас, ўзиндан мингларча тош узоқда турғанларни ҳам яшатмоқдадир.

Ү к у н а р . Сўзни узатди⁴⁶ бу... (*Юзбошига*.) Буни элтиб қамангиз, сўров чоғинда истаганча сайраб берар.

Юзбоши Маҳмудхонни олиб чиқар.

П о р л и н с у н . На тетик ҳариф⁴⁷ экан бу?

П ў н т а р . Тили тамуғ алангасиндан дунё ёқмоқчи! Тўғриси, мен ҳуркмак истадим.

Ү к у н а р . Бизнинг кучимиз бор, яроғимиз⁴⁸ бор, оқчамиз бор, билимимиз бор. Бизда борлар бунларда йўқ, бунларда йўқлар бизда бор. Шунинг учун бунлардан қўрқмаймиз, ҳуркмаймиз, истаганларини-да бермаймиз.

П ў н т а р . Бироқ буларда юрақ ёнгини бор экан.

Ү к у н а р . Юрак ёнғинларини тўплар билан, бўмбалар билан ўчирамиш.

П ў н т а р (*ўйлар*). Бўмба билан, тўп билан ёнғинми ўчирамиш?! (*Сўйлар*). Нима бўлса ҳам бўш турмаслик керак-да.

Ү к у н а р . Албатта!

Юзбошилар кетарға тайёрланиб қарашурлар.

П ў н т а р (*қўпуб*). Хайр, эмди.

Порлинсун-да қўпар.

Ү к у н а р (*қўпуб*). Кетасизми, орқадошлар?!

Кўл беришалар.

П о р л и н с у н . П ў н т а р . Кетайлик, энди. (*Айриғанда*.) Яхши кеча.

Ү к у н а р . Тинч кеча.

Юзбошилар кетарлар. Эмлоқдан келтурулган қоғозларни шкафга қўйуб, ўз еринда ўтурур.

Ў кунар (ёлғиз). Бизнинг юзбоши Порлинсуннинг бир дардими бор?! Бир нарсани йўқотғонга ўхшайдир. «Қизқани?», «чақирсангиз ёмон бўлмас»лари (чингироқни босиб) кўбда жонсиз эмас.

Родубиби келиб, бosh эгар.

Ў кунар. Дилнавоз бегим борми?

Роду. Бор, соҳиб!

Ў кунар. Ухладими?

Роду. Йўқ, соҳиб!

Ў кунар. Юбор шуни!

Родубиби бosh эгіб чиқар.

Бу қиз-да тангрининг балоси! Кўнмайдирми, кўнмайдир! Нима қилсанг, бўш. Алдадим... кўрқитдим... сўқдим... ялиндим — бўш. Шу кеча ишни битирмак керак.

Дилнавоз кирар, қайғу остинда эзилиб, оғир-оғир юрар. Дераза ёниндағи ўриндуқга бориб ўтурур. Ўкунар қилинчи бўйнидан чиқарив, ёниндағи ўриндуқга кўяр экан, сўйлар.

Яқинроқ келингиз!

Дилнавоз. Нима дейсиз менга?!

Ў кунар. Яқинроқ келингиз, дейман.

Дилнавоз. Мени нечун чақирдингиз?!

Ў кунар. Яқинроқ ўтурингиз, сўзим бор.

Дилнавоз. Уч ойдир, ҳар кеча сўзим бор, деб чақирасиз. Қийнамоқдан бошқа бир ишингиз йўқ. Ортиқ етар. Сизникини мен, меникини сиз эшитдик. Ҳеч бирининг унуми йўқ.

Ў кунар. Уни мен-да биламан.

Дилнавоз. Билсангиз, ортиқ гапурмангиз!

Ў кунар. Бу кеча сўнг сўзимни айтаман.

Дилнавоз. Бўш сўзнинг сўнгги бўлмас.

Ў кунар. Тинглангиз. Қаршунгизда Буюк Британия давлатининг катта бир кишиси ўтурадир...

Дилнавоз. Эски ҳаммом, эски тос!

Ў кунар. Шу ўлканинг энг катта кишилари мен билан бир йўла кўрушганлари учун ойларча маҳтаниб юралар. Беш йилdir, Лоҳурнинг пўлис қўмиссари бўлиб турбмен. Бу кунгача истаганимни йиглатиб, истаганимни кулдира билдим. Мен сени суйған бўлмаса эдим, ишингни бунча узатмас эдим. Биринчи кечада ё бўйсундирадим ё бошингни кесар эдим, буларни ўзинг яхши биласан. (Дилнавоздан жавоб кутуб тинар. Жавоб олмағач, яна сўйлар.)

Менга бўйинсунмай турибсен. Ўзингта яхши бўлмас. Бу кун сени қамоқда чурутмак, сурғун этмак, ўлдирмак-да қўлимдан келадир. Шунларними истайсан? (Бир оз тинар, Дилнавозни жим кўргач, яна сўйлар.) Сен онгсиз бир қиз эмассан. Менга ўртоқ бўлиб яшамоқни истамаслигинг тентакликдир. Кел, яқинроқ кел. (Дилнавоздан бир сўз, бир тебраниш кўрмагач, ериндан туриб унга тўғри юрар.) Сиз онгли бир қиз эрурсиз. Яхши-ёмонни онгларсиз. (Дилнавозга яқинлашгач, у-да ериндан тураг, аччиғидан, мегизи сал сарғайган, титраб турадир.) Келингиз, шунда ўтурайлик. (Қўлини тутмоқ истар.)

Дилнавоз (ўзини йўқотған каби қўлини қаттиғ тортиб, қичқирап). Йўқ...

Ўкунар сесканиб, ўзини орқага ташлар. Аччиғланиб Дилнавозни ўмузидан⁴⁹ тутиб итариб юборур. Дилнавоз Ўкунар ўтурган ўрундуқ остига келиб тушар. Яна бот қўпар, ўз ўриндуғи сари юрар.

Ў кунар. Тентак қиз, тентак! Бу нима иш?! (Тўпкончасини чиқариб мосо устина қўяр.) Бу кеча ё мен, ё шу! Онгладингми?!

Дилнавоз (ўз ерига ўтуруб). Чумчуқдан кўрқкан тариқ экмас. Ўлимдан кўрқса эдим, уч ой сен билан талашмас эдим.

Ў кунар (Дилнавоз сари юриб). Бу ерга ўтур, дедим сенга.

Дилнавоз. Дедим сенга, ўтурмам!

Ў кунар (Дилнавознинг елкасиндан тутуб). Ўтқизмоқ қўлимдан келмасми?

Итариб юборур. Дилнавоз бурунғи ерга йиқилур, яна турур.

Дилнавоз. Нима истайсан мендан, йиртғуч ҳайвон! (Ўз ерига бориб ўтурур.)

Ў кунар (тўпкончасини олиб). Шундайми?!

Дилнавоз (ўлар). Аччиғини келтирай, ўлдурсун-да, кутулав. (Сўйлар.) Номусинг бўлса, ур! Бир англиз мингбоши ҳайвон деб, менга қараб турубдир, ўли!..

Ўкунарнинг қони бузулур. Юзи кўрқинчли бўлур. Тўпкончасини Дилнавозга тўғри қиласар. Бўшата ёзар. Бирдан қўлини тортар. Тўпкончасини мосоға кўяр...

Ў кунар. Кулайгина ўлиб қутулмоқни истайсен. Йўқ, у деганинг бўлмас. Тўхта, мен сенга кўрсатайин! (Сўзни битирмасдан электрикнинг биттасини ўчуруб, уйни ярим қоронғу қиласар.) Мана ўйинни кўр энди! (Чингироқни босар.)

Родубиби кирап.

Ү кунар (*Rodufa*). Бу кеча маним ишим бор, ҳеч ким билан күриша олмаймен. Қопучиға сўйла, кимсани ичка-ри қўймасун.

Роду (бош эгиг). Хўб, соҳиб!

Ү кунар. Менга арақ кетур!

Роду. Хўб, соҳиб! (Бош эгиг, кетар.)

Ү кунар. (*Dilnavoz sari yuriib*). Ҳукуматга қаршу ишлаб турганингни билатуруб, сени қамоқға юбормадим. Ўз уйимда сақладим. Сен-да ўзингнинг ким эканингни унудинг. Менга катталик қила бошладинг. Гапур, ҳукуматга қаршу ишлашган йўлдошларинг кимлар?!

Дилнавоз. Бутун ҳиндлилар!

Ү кунар. Бутун ҳиндлиларми?!

Дилнавоз. Албатта, сенек аҳмоқ, виждонсиз кишилари бўлған бир ҳукуматга ҳиндлилар нари турсун, бутун дунё қаршудир.

Ү кунар (*tutmoқчи bўlib*). Сўзнинг устини ёпма.

Дилнавоз (*irgib turib қичқирап*). Йўқол! (*Ўкунар сезканур*.) Эр бўлсанг, тўппонча билан кел.

Ү кунар. Тўппончам, милтиғим, тўпим, бўмбаларимда бор.

Дилнавоз. Бор, шунларни келтур. (*Ўтуруб, бошини қўллари орасига олиб турар*.)

Ү кунар (*юмшоқча*). Дилнавоз! Ўзингга ачинғин!

Шу паллада бошдан-оёқғача қоп-кора кийинглан уч ниқобли кириб,

Ўкунарнинг кетида туралар. Қўлларинда ханжарлари бор.

(*Ўкунар сезмасдан Dilnavozga gapura berar*.) Мени тингла, кўттар бошингни. (*Жавоб кутар*.) Шундайми? Менга қарамайсенми?! (*Жавоб кутар*.) Энди ўлимга та...йўрлан...

«Тайёрлан» сўзи оғзинда экан, тўппончасини олмоқ учун қайрилғач, ҳалиги ниқоблилар ханжарларини кўкрагига тўғри тутарлар. Ўкунар сўзини битирмасдан, сесканиб кетар. Унинг сесканганидан Дилнавоз бошини кўтарур.

Ү кунар (*қўрқув аралаш*). Ким?!

Биринчи ниқобли (*қўрқинчли товуш билан*). Ўлум.

Дилнавоз. Оҳ, кутулдим!

Ү кунар. Нима истайсиз?!

Иккинчи ниқобли. Қон!

Ўкунар тўппончасини олмоқ учун, Родуни чақирмоқ учун тебраниб кўрар, ниқоблилар қўймаслар.

Учинчи ниқобли. Мингбоши ҳазратлари! Ўлум кучогига тушгач, тебранмассангиз-да бўлур!

Ү кунар. Сиз ким?!

Биринчи ниқобли (*қўрқинчли товуш билан*). Бир йўла айтдим: ўлум!

Ү кунар. Нима истайсиз?

Иккинчи ниқобли. Иккинчи йўла айтаман: қон!

Ү кунар. Нечук қон?!

Учинчи ниқобли. Золим қони!

Ү кунар. Оҳ... ўғрилар... хоинлар!..

Иккинчи ниқобли. Биз ўғри эмас!

Ү кунар. Бу ерга кимдан сўраб кирдингиз?!

Учинчи ниқобли. Сиз кимдан сўраб бизнинг ўлкамизга кирдингиз?!

Иккинчи ниқобли. Бу қизнинг қишлоғига сизни ким чақирған эди?!

Учинчи ниқобли. Кимдан сўраб, буни қочирдингиз?!

Иккинчи ниқобли. Ўғри сизга дерлар!

Учинчи ниқобли. Сизга хоин дерлар!

Ү кунар. Тилагингиз нима? Сўйлангиз!

Иккинчи ниқобли. Қонингиз!

Учинчи ниқобли. Бошингиз!

Ү кунар. Оҳ... ёввойилар. Инсон қони, инсон бөши истайлар.

Биринчи ниқобли (*ёввойи бир кулиш билан*). Йўқ... золим қони истаймиз!

Дилнавоз (*йилар*). Бу товуш?! Бу менга таниш?!

Иккинчи ниқобли. Сизнинг қиличингиз билан тўкилганлар булоқ суви эмас, инсон қони эди. Сўровсиз қолсунми?

Учинчи ниқобли. Сизнинг буйруғингиз билан кесилганлар бузов боши эмас, инсон калласи эди. Ўчи олинмасунми?! Сўзни узатмайлиқ. Бизни тинглангиз!

Ү кунар (*bir oz tinchlaniб*). Буюрингиз, сўйлангиз, нима истасангиз, берайин.

Учинчи ниқобли. Сизнинг буйруғингиз билан бу кун «Исломия эмлодиги»да тинтуб бўлған, шундан келтурган қофозлар, ёзувларни сизга топширдилар...

Ү кунар. Менга топшурмадилар.

Учинчи ниқобли. Ёлғон чоғи эмас, шул қофозларни бизга топшурингиз.

Ў кунар. Қоғозлар менда эмас, пўлис бошқармасига юбордим.

Учинчи ниқобли. Бермайсизми?!

Ў кунар (ялиниб). Бўлмаса, нимани берай?!

Биринчи ниқобли (қўрқинчли товуш билан иккинчи ниқоблига). Бажар ишни!

Иккинчи ниқобли ханжарни кўтариб, Ўкунарга солар.

Ў кунар (ханжар учи ўмизига тегар-тегмас). Тўхтан-гиз, топиб берайин.

Иккинчи ниқобли ўз кўлинни сақлар.

Қоғозлар мана шу шкафдадир, очиб олингиз.

Биринчи ниқобли шкафдан қоғозларни олар.

Шкафнинг бир четида мана шу сандуқнинг очгучлари бор. Олингиз, шу сандуқни очиб, олтунларимни ҳам олингиз, мени ўлдирмангиз.

Учинчи ниқобли. Инқилобчилик, бошқа нарса, олтун ўғрулиқ бошқа нарсадир.

Биринчи ниқобли. Меним ишим битди. Сиз ҳам, бунинг ишини битирингиз!

Ў кунар (ялиниб). Менга тегмангиз. Нима десангиз, берайнин.

Иккинчи ниқобли ханжар билан урар. Ўкунап «воҳ» деб йикулур.

Жони чиқар. Учинчи ниқобли унинг бошини кесмак учун тиришар. Дилнавоз ҳуркуб кўпар. Шу паллада Родубиби бир патнусда бир шиша арақ билан румка олиб кирад. Кўзи буларга тушгач, «оҳ» деб қичқи-рар. Патнус кўлидан тушар. Биринчи ниқобли ханжар билан Родуга югарар. Дилнавоз орага кирад, Родуни қулоқлар.

Дилнавоз. Йўқ, бунга тегмангиз, бу ҳиндлидир.

Биринчи ниқобли (ўзининг туб товуши билан.) Ундай бўлса, юрингиз, уни ҳам олиб борайлиқ. (*Юзини очар.*)

Дилнавоз. Оҳ... Раҳимбахш. Сенмисен?! (*Раҳимбахшнинг қучогига отилур. Бошини унинг кўкраги узра қўяр.*)

Раҳимбахш (Биринчи ниқобли). Кел малак... юрагимни тингла!

Родубиби (эсини йўқотар.) Хи-хи-хи... хо-хо-хо... мана-мана, хи-хи-хи...

Бариси обдираб, унга қарайлар.

Лочин, лочин... Хо-хо-хо... Қоч, қоч, соҳиб, қоч... Мана, мана, мана қоч! (*Қўл, оғиз, кўзи билан имлаб турар.*)

Дилнавоз. Эсиз! Эсини йўқотди. (*Келиб Родуни тутар.*) Она... нима бўлди сенга? Мен билан кетасанми?

Роду. Лочин, лочин... қоч, соҳиб... Мана, мана, мана...

Дилнавоз. Меним туткунликда онам эдинг сен. (*Манглайиндан ўтар.*)

Роду ҳеч биттасини сезмасдан, маъносиз сўзларини айта берар.

Раҳимбахш (Дилнавоз қўлни олиб). Жоним, мала-гим! Бундай ишлар қурбонсиз бўлмас, ҳайда, кетайлик.

Дилнавоз (Раҳимбахшга эргашӣ, Родудан бир одим узоқлашғач, яна турар. Родуга қараб сўйлар). Моможоним!

Роду кўк сари қараб имлаб, жилмайиб турар.

Мен билан юрмадинг, менга ҳақларингни ҳалол эт! Оҳ... сен эсингни йўқотдинг, қамоқдан чиқғандек бўлдинг. «Менлик», «сенлик», «ҳақ», «ҳалол» деган чанбарлардан кутулдинг. Сен чин эркли бўлдинг эмди. Бироқ мен... (*Яна Родунинг манглайини ўтгандан кейин Раҳимбахшнинг қўймаслиги билан чиқар.*)

Родудан бошқалари-да чиқарлар. Парда Родунинг ратси⁵⁰ кулушлари орасинда тушар.

ТЎРТИНЧИ ПАРДА

Кундуз. Гангар тофинда бир мағора⁵¹. Тепасидаги тор тунглиқдан ёруғлиқ оладир. Мағоранинг сўл пучмогинидағи тор бир айланма билан ташқарига чиқадир. Мағоранинг бир ёғида кичкина бир мосо, бирда ўрундиқ кўйулған. Девор остинда ясама оқчалар билан қўзғатгу битик терилган. Қаршу ёқда еттита ўн биротар англиз милиқлар қаторланған, бир чеккада ўқ садоқлари тартибсизча турадир. Унларнинг нари ёқинда ичинда тўрт бўмба кўйулған бир ёғоч кути, кути узра уч-тўрт қоп қатланиб кўйулған. Раҳимбахш мосо бошинда ёзib турадир. Дилнавоз емак пицирилар. Маҳмудхон билан уч иши битиклар ҳам ясама оқчаларни боғлаб, ратлаб туралар. Бадринат соҳиб тор ўйл оғзинда узаниб ётган.

Биринчи ишчи. Дилнавоз хоним, ош қачон?

Дилнавоз. Соат неча?

Иккинчи ишчи (билақ соатига қараб). Ўн икки.

Дилнавоз. Яна икки соат бор. Шошмангиз.

Биринчи ишчи. Оч қолдик-ку.

Иккинчи ишчи. Сенинг қурсоғинг тегирмонмидир, бунча оч қоласан?!

Биринчи ишчи. Шамолми едим?!

Бадринат. Мен жуда ишдан чиқдим.

Иккинчи ишчи. Сиз-дами оч қолдингиз?!

Бадринат. Очлик ҳам гапми? Ўлдим! Эшик тагинда турубмен? Ел эсиб ўтадир. Кишининг курсофи кўб ишлайдир.

Биринчи ишчи (иккинчига). Бу кишининг-да курсофи тегирмонми?

Иккинчи ишчи. Албатта ҳамда ел тегирмони! (*Кулалар*)

Дилнавоз. Бир соатдан бурун кимсага ош йўқ.

Бадринат. Дилнавоз хоним! Сиз қозон бошинда турибсиз...

Иккинчи ишчи. Қозон хони... қозон хони. (*Кулалар*)

Бадринат. Истаганда олиб ейсиз. Оч ҳолини тўқ билмас.

Биринчи ишчи. Бу орада оч қолмаған киши Раҳимбахш соҳиб калласини тушуруб ёзғани-ёзған.

Иккинчи ишчи. Ёзув ёзмоқ, қорин тўйдурадир, биласанми?!

Дилнавоз. Шундайми? Кўб яхши қозон-тобоқни йиғиштурамиз, оч қолғанга қофоз-қалам берамиз, ёзув ёзсун.

Иккинчи ишчи. Мен ундан парҳез.

Дилнавоз. Нечун?!

Иккинчи ишчи. Дўқтур буйурған.

Раҳимбахш. Мен-да кўб тўқ эмасмен.

Биринчи ишчи. Жим турубсиз-ку!

Раҳимбахш. Нима қилай? Меним гапим билан емак бот пишарми? Сиз тор кўнгулли кишилар. Гапурмай тура олмайсиз. Гапура-гапура, ўзингизни-да, Дилнавозни-да ишдан қолдирасиз.

Дилнавоз. Кечирасен, ўртоқ, мен ишдан қолмадим.

Учинчи ишчи. Мен зулмга қаршу ишлаймен, бу йўлда очлиқдан ўлсам-да майли.

Биринчи ишчи. Яша, Гулдодхон, афлонлигинги кўрсат.

Бадринат. Афлонлар — ботур кишилар. Англизларнинг бир қилиғи бор: англиз бўлмаған ҳар ким билан кўрушганда, буюк бир катталик билан гапуралар, кўб сўзига жавоб-да бермайлар. Бироқ бир афлонни кўргач, ялинурға мажбур бўлалар.

Раҳимбахш. Дилнавоз хонимни Ўқунардан кутқарганимиз кеча Ўқунар уйидан чиқиб, Маҳмудхонларни кут-

қарғали борганимизда Гулдодхоннинг кўрсатган ботурлиқлари эсдан чиқғуси ишлардан эмасдир. Буюк қаҳрамонлиқ қилди.

Бадринат. Яшасун! Чиндан-да буюк иш кўрсатған экан.

Биринчи ишчи. Бу афлонлар ўзларини «Бани Исроил» болалари⁵² дейлар, тўғрими?

Учинчи ишчи. Ҳа, биз бани Исроил.

Иккинчи ишчи. Йўқ, жоним, тўғри эмас. Жуҳуд боласи бўлганда, бир оз кўрқоқ бўлар эдилар?

Учинчи ишчи. Бу тўғрида ҳадис бор.

Бадринат. Буни Раҳимбахш соҳибдан сўрайлиқ.

Учинчи ишчи. Кўб яхши, айтсунлар.

Раҳимбахш. Бир кўб афлон тарихларинда афлонларни бани Исроил деб кўрсатилган. Бу тўғрида тонуқлар⁵³ ҳам кетурилган.

Учинчи ишчи. Ҳа... тонуқларимиз кўб.

Биринчи ишчи. Ниндай тонуқлари бор?

Раҳимбахш. Биринчи тонуқлари шул ҳадис, иккинчи тонуқлари «тайласан» деган лунгидек бир кийимлари. Айталақим, бани Исроилда ҳам шу тайласан бор эмиш. Учинчи тонуқлари соч қўйиш экан, тоғ орасиндағи афлонлар жуҳудларча соч қўяр эканлар. Менимча, бу тонуқлари бутунлай чурук.

Учинчи ишчи. Нега?!

Раҳимбахш. Негаким, бундай тарихий буюк сўровларга ҳадис билан жавоб бериб бўлмайдир. «Тайласан» деган кийимлари эски юнонларда ҳам бор эди. Бунинг Юнондан Эрон орқали Афлонга ўтганлиги узоқ эмасдир. Соч қўйишлари эса Эронда ҳам бор.

Бундан бошқа тарих билими Фаластинданд Афлонистонга бир кўчиш ё кўчдуруш бўлганини кўрсатмайдир. Менга қолса, бу тугунни ешмак учун, икки йўл бор. Бири — ер остини қазиб, очиқ излар, белгилар изламак. Иккинчиси — афлон тили билан жуҳуд тили орасинда бир яқинлиқ ахтармоқ. Менимча, афлон тили билан жуҳуд тили орасинда бир яқинлиқ йўқға ўхшайдир. Бироқ бу тўғрида узилкесил бир нарса айтмак меним ишим эмас, тиллар билимiga уста кишиларнинг ишидир.

Учинчи ишчи. Майли, бу ишлар бўлғанча, биз жуҳуд боласи бўлуб қолармиз.

Иккинчи ишчи. Майли, нима бўлсанг бўл, бироқ ишла, тириш.

Учинчи ишчи. Тиришмак истамаса эдик, шаҳардан, қишлоқдан узоқлашиб, тоғлар, мағоралар орасында бундай ишлаб турар эдикми?

Бадринат. Яша, афғон!

Иккинчи ишчи. Яша, жуҳуд боласи.

Кулалар. Шу паллада тор йўлдан ҳуштак товуши эшитилар, ҳаммалири обдираб қарайлар.

Раҳимбахш (ёзгични қўйиб). Орқадошлар, қоровулимиз қора кўрди. Турунгиз... яроқланайлик.

Ҳаммалари туруб, ўн биротарларини олиб, ўқ уяларини кўруб, тайёрланурлар.

Бадринат. Ўз кишиларимиздан бўлса керак.

Раҳимбахш. Шундай бўлса керак.

Биринчи ишчи. Майли, биз тайёр. Таниш бўлса — салом, ёв бўлса — ўқ, кела берсун...

Раҳимбахш (биринчи ишчига). Орқадош! Бўмбаларни чиқариб қўйингиз.

Биринчи ишчи ёғоч кутидан бўмба чиқариб мосо узра қўяр. Шу чоғда милтиқ, садоқ⁵⁴, тўлпонча, дурбин билан яроқланган қоровул кирад.

Раҳимбахш. Ким экан?

Қоровул. Ўзимииздан экан, соҳиб!

Бадринат. Ўрон⁵⁵ бердими?

Қоровул. Берди. Чилон ёғочининг остиға келгач, бироз турди. Ўнг қўлини икки йўла кўтарди.

Раҳимбахш. Сизда чиқиб ўрон берингиз, келсун.

Коровул чиқар.

Бадринат. Ҳайдангиз, ишларимизни кўра берайлик. Ҳали бизга яхши хабарлар келса керак.

Ҳаммаси бурунги ўз ишига ўтурур.

Биринчи ишчи. Яхшими, ёмонми, нима бўлса, хабар бўлсун. Юртдағи йўлдошларимизнинг ҳолларини билдиб олайлиқ.

Раҳимбахш (Биринчи ишчига). Ўртоқ, бу бўмбаларни ерига қўйингиз.

Биринчи ишчи бўмбаларни кутиға қўйиб, яна ўз еринда ўтурур.

Иккинчи ишчи. Дилнавоз хоним, ош пишдими?

Дилнавоз. Бир оз турасиз.

Биринчи ишчи. Бу кунги эт қаттиғ экан, бот⁵⁶ пишмаса керак.

Иккинчи ишчи. Жоним! Ош бўлғанда ҳам ҳалига-ча пишар эди.

Дилнавоз. Келган кишининг гапларини эшитмаганима, меним томофимдан нарса ўтмайдир.

Иккинчи ишчи. Мен ҳам шундай.

Қоровул кирад.

Раҳимбахш. Келдими?

Қоровул. Келди. Бир хотун экан.

Раҳимбахш. Келсун.

Қоровул қўли билан йўл кўрсатгач, бош-оёқ яланг, қора йиртиқ кўйлакли, чирмашиқ тўзонли сочли 45 яшар бир хотун қўлида эгри-бугри бир таёқ тутуб кирад, бош эгар.

Раҳимбахш. Қаердан келасиз?!

Хотун. Ҳиндустондан.

Раҳимбахш. Қаерга?

Хотун. Ҳиндустонга.

Раҳимбахш. Отингиз?!

Хотун. Бўмба. (*Кимсага билдиримайин, мағоранинг ҳар ёқиға қарап.*)

Раҳимбахш. Хуш келдингиз!

Дилнавоз ишончизча қараб турар.

Бадринат. Ҳўш, галирингиз, қани! Нима иш, нима хабар билан келдингиз?

Хотун. Зайд соҳибни кўргали келдим.

Бадринат (Раҳимбахши кўрсатиб). Мана Зайд соҳиб.

Хотун (Раҳимбахфа бош эгиб). Мени Пешовардан наvvоб Муҳаммад Ҳусайнхон соҳиб Баҳодур юбордилар.

Раҳимбахш. Кўб яхши. Хон Баҳодур соҳибнинг ҳоллари қалай?

Хотун. Яхши. Сизларга салом айтдилар.

Раҳимбахш. Эсон бўлғайлар, нима буюрдилар.

Хотун. Дедиларким, биз Пешоварда апрел бошлиринда ҳукуматга қаршу чиқиш ясармиз. Шунинг учун тайёрлигимиз бор. Бўмбайда Анрибил Мистар Жаноҳ соҳиб, Лоҳурда Миён Фозил Ҳасан соҳиб, Аллоҳободда Анрибил Сайид Ризо Али соҳиб, Алиқадада Ҳўжа Абдул Мажид соҳиб, Лоҳурда Мистар Мазҳар ул-Ҳақ соҳиб, Калкуттада Фазл ул-Ҳақ соҳиблар ҳам шул кунларда ялпи чиқиш учун қўмитадан буйруқлар олғанлар.

Раҳимбахш. Бизга ҳам бу тўғрида хабар бор.

Хотуннинг кўзлари шодлиқдан яширунча ўйнар.

Хотун. Пешоварда тарқатилган кўзгатту битикларнинг Зайд отли бир киши томонидан тарқатилғанини хукумат тилчилари билганлар. Бир суратингизни ҳам қайдандир топғанлар, сизни қўлга тушурмак учун бор кучлари билан тиришарлар.

Ҳаммалари эс кўярлар. Хотун ўз сўзларининг таъсирини онгламоқ учун бир оз тинар. Дилнавозда ишончсизлик.

Раҳимбахш (соғуққонли). Хўш... сўнгра?!

Хотун. Хон Баҳодур соҳиб сиздан ўтиналарким, бир неча кун шаҳарларга сира яқинлашмайин юргайсиз. Бўлғудек эса, Бофистон томонга ўтиб-да қолгайсиз.

Дилнавознинг ўзини кучлаб сақлагани кўрунур.

Раҳимбахш. Бошқа?

Хотун. Босилган битиклардан менга бир оз бергайсиз.

Раҳимбахш (Бадринатга). Чиқингиз, «Ҳиндустон» деган янги битикчадан беш юзта берингиз.

Бадринат соҳиб саккиз бетлик кичқина битикчалардан беш боғлам олиб хотунга берар. Хотун кўлтуғидан бир қопчиқ чиқариб битикчаларни солар.

Раҳимбахш. Хон Баҳодур соҳибга салом айтингиз. Кўлларини ўпармен. Илгимдан келганча айтганларидек ишлармен.

Хотун (қопчиқни кўтариб). Хуб. Яхши қолингиз.

Раҳимбахш. Яхши борингиз.

Хотун мағоранинг ҳар ёнига яна бир йўла яшурунгина қарагандан кейин чиқмоқ истар.

Дилнавоз (бирдан қайнаб кетар). Тўхтангиз... Тўхта!..

Хотун (қайрилиб). Ким? Менми?

Дилнавоз. Ҳа, сен! Сен тилчи хотунсен!

Ҳаммалари обдираб қолурлар.

Хотун (ясама бир обдираш билан). Ким? Менми? Мени тилчими дединг?! Бу қандай сўз?!

Дилнавоз. Сени дедим. Тилчisen!

Раҳимбахш (ериндан турууб Дилнавозга яқинлашур). Сенга нима бўлди, Дилнавоз?!

Дилнавоз (ишчиларга). Тутингиз буни! Бу тилчидир дейман, тутингиз буни!

Биринчи, учинчи ишчилар хотунни тутарлар.

Раҳимбахш. Нега тутдурасан буни?!

Дилнавоз. Бу тилчидир, ҳукумат тилчисидир.

Раҳимбахш. Қаердан билдингиз?!

Дилнавоз. Оҳ... меним юрагим шундай кўрсатадир. Тилчидир бу!

Раҳимбахш. Юрак кўрсатиши билан бир кишини тутуб бўлмайдир. (Ишчиларга.) Қўя берингиз!

Ишчилар қўймоқчи бўлғач.

Бадринат (ишчиларга). Тўхтангиз. (Ишчилар яна тутарлар. Бадринат Раҳимбахша.) Кўрсатишларнинг энг тўғриси юрак кўрсатишидир...

Раҳимбахш (сўзни кесиб). Қайси бир қонун юрак кўрсатиш билан бир кишини тутдурадир?

Бадринат. Қонунларга қарамангиз. Улар бўш нарсалардир.

Раҳимбахш. Нима қилмоқчисиз?!

Бадринат. Мен айтаманким, Дилнавоз хоним бу кишига ишонмай экан, биз қисқафина бир сўров қилайлик. Бу хотун сўрашларимизга тўғри жавоб бера олса, кета берсун.

Хотун. Сиз кўб қизиқ кишилар экансиз. Англиздек катта бир давлатга қаршу ишлайсиз. Ҳиндустонни қутқармоқчи бўласиз. Ўз кишиларингиздан бири мени сизга юборган экан, менга ишонмайсиз. Сиз бу онг билан, бу мия билан қандай ишлай олурсиз?! Мендан нима сўрайсиз?! Ўронингизни бердим. Хон Баҳодурнинг сўзларини айтдим. Қайсиси тўғри чиқмади?! (Раҳимбахша.) Сиз айтингизчи, ўронингизни янглиш сўйладимми?

Раҳимбахш. Йўқ.

Хотун. Хон Баҳодурдан айтган сўзларим ёлғон чиқдими?!

Раҳимбахш. Йўқ.

Хотун. Яна мендан нима сўрайсиз?!

Бадринат. Бу мағорани сизга ким дарак берди?!

Хотун. Мени сизга ким юборган эса, шул дарак берди.

Бадринат. Ўзингиз қаердан?

Хотун. Пешовардан.

Бадринат. Қайси маҳалладан?

Раҳимбахш. Кўйингиз, Бадринат соҳиб! Бу ишишим уятдир. Хон Баҳодур соҳиб эшитса, яхши бўлмас. Хон Баҳодур соҳиб бунга ишониб бизга юборибдир. Ўронни ўргатибдир. Яшурун сўзларни айтибдир. Ҳаммасини ўз қулогиги-

миз билан эшитдик. (*Хотуннинг кўзларида шодлик.*) Сиз янадан «Қайси маҳалладансен?», деб турасиз, бу иш кулунчидир. (*Ишчиларга*) Кўяберингиз!

Ишчилар хотунни кўябералар.

Хотун. Мен кетайми?

Раҳимбахш. Кетингиз. Хон Баҳодур соҳибга салом айтингиз.

Хотун чиқар.

Дилнавоз. Кетди. Қутулди. Яқинда бошимизга бир бало кетурур.

Раҳимбахш. Дилнавоз, ўтинамен шу қўрқоклиқни ташла.

Бадринат. Ҳайдангиз, ошни сузингиз, оч қолдиқ. Бўлғани бўлди.

Биринчи ишчи. Жуда ўлдиқ, ошни сузингиз.

Дилнавоз. Хўб. (*Қозондаги қовурмани икки тобоқ, бир чаноқга суза бошлар.*)

Иккинчи ишчи (суфрани ёзib, нон қўйуб). Қани кelingиз!

Ҳаммалари суфра теграсинда ўтуурлар.

Дилнавоз (учинчи ишчига). Гулдодхон, бу бир чаноқ ошни қоровулга бериб келингиз.

Учинчи ишчи. Хўб. (*Чаноқни қозон бошидан олиб қоровулга чиқарур.*)

Дилнавоз ош тобоқларини суфра узра келтуруб қўяр. Ўзи ҳам ўтуур, учинчи ишчи ҳам келиб ўтуур, ея бошларлар.

Биринчи ишчи. Дилнавоз хоним, хотунни кўб қўрқитдингиз-да.

Иккинчи ишчи. Жонини чиқардилар.

Дилнавоз. Мен шунга ишонмадим. Шуни кўргач, кўнглим қораланди.

Раҳимбахш. Жоним! «Мен ишонмадим» деб, бир кишини тутмоқ тўғрими?

Дилнавоз. Меним ўғурсиз бир кўнглим бор. Бўлғуси ёмонлиқларни бурунроқ кўрадир. Буни ўзинг-да биласен.

Раҳимбахш. Бир нарса бўлмас. Тинчлан!

Дилнавоз. Кўрарсен.

Учинчи ишчи. Бир нарса бўлғанда, нима бўлур? Биз нимадан, нега қўрқамиз? Бу ишга киришган кун жонимиздан кечмаган эдикми?

Дилнавоз. Тузук. Жонимиздан кечган эдик. Бироқ қўл-оёқларимизни боғлаб, унларга берамиз демаган эдик.

Бадринат. Дилнавоз хоним! Кўб қайғурмангиз. Ҳукумат бизнинг изимизни топиб ҳалиги хотунни юборган бўлса, у хотунни тутуб тилим-тилим қўлмоқ ҳам унумсиздир. Изимиз топилғандан кейин унларнинг тилчи хотулари бир эмас, ўн эмас, мингларча бор. Тутуб ўлдирмак билан битмас.

Ташқаридан қоровулнинг ҳуштак товуши келар.

Дилнавоз. Мана... айттаним чиқди!..

Ҳаммаси обдираб қарар.

Раҳимбахш. Шошма жоним, қоровул келсун.

Бадринат. Менга қолса, Дилнавозники тузук. Иш ёмонлашди. Турингиз, бунларни йигиштуруб, бўмбаларни тайёрлангиз.

Ҳаммалари туриб, суфра, тобоқларни йигиштуруб, кутидан бомбаларни чиқарип, мосоға-қўярлар. Қоровул югуруб кирав.

Раҳимбахш. Нима гап?

Коровул. Бизни босалар...

Бадринат. Орқадошлар, телба бўлмангиз, милтиқларимизни олиб садоқларимизни тоқайлиқ. Ташқари чиқиб, тор йўлнинг бошини тутайлиқ.

Ҳаммалари садоқларин, милтиқларин олурлар.

Раҳимбахш. Бўмбаларни-да биртадан олайлик: (*Маҳмудхон билан уч ишчи тўрт бўмбаларни олурлар.*) Ҳайдангиз, ташқариға! (*Ўзи илгари тушар, бошқалар унинг кетидан чиқарлар. Ташқаридан Раҳимбахшнинг товуши келар.*) Яқинлашалар. Югурингиз. Ҳар ким ўз булжоринда⁵⁷ турсун.

Бир оз тинишдан сўнг милтиқ товушлари эшилтур. Милтиқ товушлари орасинда икки бўмба-да портлар. Сўнгра жимжит бўлур. Икки дақиқадан кейин юзбоши Порлинсун, олти пўлис ҳамда ҳалиги тилчи хотун, Дилнавоз билан Бадринат соҳибни тутқун қилиб мағорага киравлар. Тутқунларнинг қўллари боғланған.

Бадринат соҳиб оёғиндан яраланғани учун оқсар.

Порлинсун. Келингиз, ёғийлар! Бу ерда нима ишлай эдингиз?! (*Бир дафтарча очиб ёза бошлар.*)

Бадринат. Сўрамоқ ортуқ бир иш. Шу ердаги нарсаларнинг ўзи кўрсатадир.

Порлинсун. Йўлдошларингиз қани?

Бадринат. Ўлмаган бўлсалар, қочғандирлар.

Порлинсун. Неча киши эдилар?

Бадринат. Биздан бошқа икки киши.

Порлинсун. Шунча отишған шул түрт кишиими эди??!

Бадринат. Шул түрт киши шунча отишған эди!

Порлинсун. (Дилнавозға қарағандан кейин, ўлар.)

Ўкунарнинг уйинда кўрганимдан яхшиланмиш. (Сўйлар.)

Сенинг отинг нима?

Дилнавоз. Дилнавоз.

Порлинсун. Сен-да шунларданми?

Дилнавоз. Ҳа.

Порлинсун. Сизнинг бошлиғингиз ким эди?

Бадринат. Мен эдим.

Порлинсун. Сенинг отинг нима эди?

Бадринат. Бадринат.

Порлинсун. (Пўлисларға девор тагиндаги қоғозлар билан қобларни кўрсатиб.) Бу қоғозларни қобларга солингиз. (Пўлислар қоғозларни бир қобға солурлар. Қобнинг оғзини боғларлар. Порлинсун қоб оғзини сурғич қилғандан кейин.) Қоб билан бу машинани олиб чиқарингиз. (Пўлислар унларни кўтариб чиқарурлар.) Бу иккисини ҳам чиқарингиз.

Пўлислар Бадринат билан Дилнавозни чиқарурлар. Ҳаммадан кейин Порлинсун чиқар.

Парда тушар.

БЕШИНЧИ ПАРДА

Гангар тоғининг кичкина тепалариндан бири. Ўнгдан тепага чиқар тор бир йўл. Сўлда кўкарган иккى-уч тоғ оғочлари. Тепанинг нари ёғинда узоқдаги ўрмоннинг устигини кўрунадир. Қуёш янгиғина ботған. Ҳаво қоронгулана ёзган. Саҳна жимжит. Бир оздан кейин тепанинг сўл ёқидан (йўлсиз томондан) Раҳимбахш тирмашиб чиқар.

Раҳимбахш (у ён-бу ёнға қарағандан кейин чарчаганин кўрсатиб.) Уф... мана шу ер яхши экан. Шунда бир оз турайлиқ. (Тубанга қараб, ўртоқларини қўли билан чақирғандан кейин ўтуруб, тушунчага толар.) Оҳ... Дилнавоз... баҳтсиз бир юртнинг баҳтсиз қизи бўлғанинг етмас экандек, баҳтсиз бир йигитнинг баҳтсиз бир севгилиси ҳам бўлдинг. Учмоҳдек боғчалардан ажраб, томуғдек мағораларда яшадинг. Малак эдинг, шайтонларга тутулдинг. (Узоқларни тинглағандек бўлуб.) Оҳ... «Мени кутқар!» деган товушинг кулогимдан кетмайдир. Кутқарурмен. Сени бир неча йўла Ўкунардан қандай кутқарған эсам, яна шундай кутқарурмен... (Биринчи, иккинчи, учинчи ишчилар билан Маҳмуджон тир-

машиб чиқарлар.) Келинг, ўртоқлар! Шунда бир оз турайлиқ.

Ҳаммаси ўтуурлар.

Маҳмудхон. Нима қиласиз энди?

Раҳимбахш. Шунда пойлаб турамиз. Унлар ана у катта йўлдан ўтарлар...

Учинчи ишчи. Шундами тутармиз?

Раҳимбахш. Йўқ. Унлар узоқдан кўрингач, илдам югуруб, ана у ўрмонлиқга борармиз. Шунда борғанларинда босармиз.

Маҳмудхон. Бир иш қиласиз, шул хотун тузоқға тушғай. У қутулса, иш чатоқ.

Учинчи ишчи. Албатта... У шайтон хотун кимлар билан ишлаганимизни билиб кетди. Қочиб қутулса, бутун йўлдошларимизни тутдурғусидир.

Раҳимбахш. У ўрмонлиқ кенгтина ердир. Унда борғанду ҳаммасини тузоқға тушурмиз.

Учинчи ишчи. Бадринат соҳиб билан Дилнавоз хонимни ҳам кутқарурмиз.

Маҳмудхон. Улар нечук тутулдилар?

Раҳимбахш (биринчи, иккинчи ишчиларни кўрсатиб.) Бунлар тоқға чиқғандан кейин мен тор йўлнинг ўнг ёғиндаги бир қоянинг панасинда ерлашдим. Бадринат соҳиб мендан устарак турган эди. Дилнавоз-ку сизлар билан шул ёқга кетган эди.

Маҳмудхон. Ҳа.

Раҳимбахш. Сиз ўз булжарларингизда ерлашдингиз. Дилнавоз ҳам бир оғочнинг панасинда қолди. Менга кўрунуб турған эди. Ёв бизнинг ёқни кўргач, сўлға бурулди. Учтаси йиқилғандан кейин қолғани оғочга яқинлашди. Мен Дилнавознинг қийноқда қолғани онглағач, югуриб бормоқчи бўлдим. Бирдан кучли бир кўл елкамдин тутди. Қарасам, Бадринат соҳиб. «Сиз нега келдингиз?», дедим. «Сизнинг тушунчагизни онглаб келдим» деди. «Нима истайсиз?» дедим. Айтдиким: «Ишимиз ёмон. Қочмоқ керак». Мен бу сўздан қизидим. «Дилнавозни кўйуб қочмам» дедим. Бадринат соҳиб дедиким: «Сиз Дилнавозни ҳам қўймангиз, қўмитанинг мағорадаги шунча нарсаларини ҳам унутмангиз. Бироқ шу паллада қочмоқдан ўзга йўл йўқ. Мен бошқа орқадошларға қочмоқ ишорати бердим. Сиз-да шулар билан қочингиз, мен Дилнавознинг кўмагига борамен. уни кутқара олсан, эришамен. Кутқара олмасам, ўзим ҳам унинг ёнинда қолғали

тутуламен. Сиз йўлдаги ўрмонлиқға бориб турингиз. Бунлар шундан ўтарлар. Йўлларини тўсуб, ўзларини йўқ этиб, бизни кутқарурсиз». Мана мен Бадринат соҳибининг айтган шу сўзлари учун сизни бу ёрга кетурдим.

Маҳмудхон. Сўнгра нима бўлди??

Раҳимбахш. Оҳ, дўстим! Нарисини сўрама! Кўр бўлғай эдим-да, кўзим кўрмагай эди! Бадринат Дилнавозфа эришғач, пўлислар-да етишдилар. Дилнавоз билан Бадринат соҳибни тутдилар. (Бутунлай ўзгариб.) Уф... мен буюк виждансилиқ этдим. Дилнавозимни кутқармасдан қочдим. Оҳ, бахтсизлик!

Учинчи ишчи. Жоним, нима бўлди сенга! Тетик тур! Дилнавознинг бу иккинчи тутулишидир. Биринчи йўла кутқарғанимиздек, бу йўла ҳам кутқарумиз.

Иккинчи ишчи. Энди шунда турмизми?

Раҳимбахш. Йўқ. Унларни пойлаб турубмиз. Қораларини кўргач, ўзимизни ўрмонлиқға олурмиз.

Маҳмудхон (узоқдан бир нарсани кўргандек бўлуб). Ана, келдилар. Турингиз!

Раҳимбахш. (Maҳmudxon қaрагan сari қaраб.) Ҳа-ҳа, келдилар. Орқадошлар, еримиздан қўпмайғина тепадан туша берайлик. Қўпсоқ, кўрурлар.

Учинчи ишчи. Мен кетдим.

Ўзини тепадан тубанға кўя берар, бошқалар ҳам учинчи ишчидан кейин туша берарлар. Раҳимбахшон тепада узаниб келгандарни пойлар. Бир оздан кейин ошоғига⁵⁸ қараб, йўлдошларига сўйлар.

Раҳимбахш. Катта йўлдан чиқдилар. Шу тепага келатурған тор йўлга кирдилар. Шу тепага секин-секин кела-лар. Ўзимизни ўрмонлиқға олайлиқ. (Бир оз туриб ўзини тепадан ташлар, йўқолур.)

Саҳна бир-икки дақиқа жимжит қолар. Сўнгра тепага чиқатурған тор йўл томониндан юзбоши Порлинсун нинг товуши эшитилар.

Порлинсун. Мана шу тепа яхши экан. Сен бориб йўлдошларинга айт. (Порлинсун билан бир пўлис соҳиб саҳнага кираплар.) Бир кишини отларға қоровул қўйсунлар. Бошқалари нарсалар ҳам тутқунларни олиб шунга келсун-лар. Сен меним ўрундугимни кетур. (Пўлис салом олиб чиқар. Порлинсун юруб сўйлар.) Ўшаларнинг тўртгаси ўн икки кишимизни ўлдурубдур. Ўзларидан бир киши ҳам ўлмаган! Бироқ иккитаси кўлға тушди. Улар «биздан киши ўлмади» деб шодланалар. Аҳмоқлар, буни онгламайларким, биздан ўлдирганлари ўн икки киши ҳам ўзлариндан эди! Улар-да

ҳиндустонли эдилар. Ўз қиличлари билан ўзларини кесмак — мана энг буюк хунар!.. (Кўпуб.) Бу қизни демайсизми! Бунинг тутилғани!.. Мен бу қизни мингбоши Ўкунарникида кўрган эдим. Шуни кўлга тушургали бир озда тиришган эдим. Бу кун бу менинг кўлимға тушубдир.

Пўлис бир «йўлчи ўрундуғи» (катлама устул) олиб келар, юзбоши кўрсатган ерга қўяр. Юзбоши ўрундуға ўтурур. Беш пўлис билан тилчи хотун нарсалар билан тутқунларни келтуралар. Юзбошиға салом берарлар.

Бадринат (тепанинг ҳар ёқиға қарагандан кейин ўйлар). Бу нима? Бу кеча ўрмонлиқдан ўтмай, шундами ётамиз?!

Порлинсун. Ҳайдангиз, бир чеккада ўтурингиз. Қоронғу кечада ўрмонлиқдан ўтмоқ яхши эмас. Ҳусайн қоровуллик этсун.

Пўлислар юзбошининг буйругини олғач, тутқунларни бир чеккада ўтқуурлар, милтиқларини тепанинг ўртасинда «чотма» қилиб, ўзлари тутқунларға яқинроқ ўтурурлар, бир-бирлари билан гаплашалар.

Ҳусайн деган пўлис қоровуллик қилас.

Порлинсун (Бадринатга). Шу тоғлиқда биз босған мағорада ҳам ўчоқларингиз борми?

Бадринат. Юзбоши! Сиз бизни тутишға буюрган эдингиз. Ишингиз бизни кўлға тушурмак эди, тушурдингиз. Яна бир ишингиз қолдиким, бизни Пешоварға элтиб, сўровчиларга топшурмоқдир. Биздан гап сўрамоқ ишингиз эмасдур.

Юзбоши жим бўлур. Пўлислар эснай бошларлар.

Бадринат (ўйлар). Тангри Раҳимбахшга эс берсин-ким, ўрмондан берирақ келиб бизни излагай. Эртагача бизни шул ўрмонлиқда кутиб турса, ишимиш битди!

Порлинсун (тилчи хотунга). Бу қизнинг қўллари-ни ечиб қўй. Оврупа адолати хотунларни бу ҳолда кўрмак истамас.

Дилнавоз (Бадринатга эшиштирибгина). Яна шайтонлик бошланди.

Тилчи хотун. Хўп. (Ериндан туруб, Дилнавознинг орқасига ўтар, қўлини еча бошлар, Бадринатга сўйлар.) Ёввойилар, ўзингиз-ку майли, кўзларингиз чиқсун. Гул каби бир қизни нима деб мағораларда қийнаб тутасиз? (Бадринат эшиштасликка урунадар. Хотун Дилнавознинг қўлларини ешиш, ўз ерига бориб ўтурур. Дилнавоз қўлларини ешишгандин шодлангудек бўлмаганини кўрсатиб турар. Хотун

юзбошига сўйлар.) Юзбошим, бу гўзал қиз жуда онгли бир қиз-да.

П о р л и н с у н (*тушунча орасинда*). Шундайми?!

Т и л ч и х о т у н . Жуда эсли. Мен буларнинг мағорасиға борғанда, шу кишидан бошқалари мени танимадилар, менга ишондилар. Бу киши эса мени тутдириб ўлдумоқчи бўлди. (*Кулиб юборур.*) Бояқиши Зайд менга ишонганин сўйлаб, жонимни кутқарди. (*Пўлислар эснай бошладилар.*) Бу кишини яширин пўлис бошқармасига қўйсангиз, давлатга кўп хизмат қўлғусидирлар.

Юзбошининг толиб кетганинг кўргач, бу ҳам узаниб ётар. Пўлислар кўзларини йўкудан очолмай туралар.

Б а д р и н а т (*ўйлар*). Тангirim, Раҳимбахшга эс бер!

Саҳна жим-жит қолар. Қоровул тепанинг тор йўл томон ёқасинда кезиб турар. Бир оздан кейин Раҳимбахш боя кетган ериндан бошини секингина чиқариб, бот йўқолур. Бир оз ўтгач, Раҳимбахш тўппончалиги портлар. Ўқ қоровулға текқач, тепадан юмаланиб тушар. Раҳимбахш билан йўлдошлари илдам чиққиб чатмаға⁵⁹ келурлар, ўтурған қоровулларга милтиқ тўғрилаб турарлар. Бу ишлар жуда тезлик билан бўлиб ўтар.

Р а ҳ и м б а х ш (*туриб, яроқланурға вақт топа олмай, обдираб қолған қоровулларға*). Ким қимиirlаса, ўлур! (*Юзбоши Порлинсуннинг қўпид тўппонча чиқара ёзғанини кўрган Маҳмудхон, қўлиндағи тўппончани бўшатур. Ўқ юзбошининг кўкрагиндин тегар. Ийқилиб, талпина-талпина жон берар. Раҳимбахш Маҳмудхонга сўйлар.*) Сиз буларнинг қўлларини ешингиз. (*Маҳмудхон Бадринатнинг қўлини еча бошлар. Бадринат қўли ечиғач, ериндан қўпар. Дилнавоз ҳам қўпар. Раҳимбахш қоровулларға сўйлар.*) Орқадошлар! Сиз бизнинг юртдош, қурдошларимиз эрурсиз. Бизнинг юракларимиз сиз учун урадир. Биз мана шундай қоп-қоронғу кечада кўрганингиз мағоралар, тоғлар, тепаликларда қийналиб юрамиз. Сизни кутқармоқ, сизни яшатмоқдан бошқа бир тилагимиз йўқ. Сиз келиб, бизни босдингиз! Биз билан отишдингиз: Иккевимизни тутдингиз. Бироқ биз биламиз-ким, бу ишларнинг ёзуғи сизда эмас. Юзбошингиздадир. (*Қоровулларнинг юзлари кулар.*) Шунинг учун шу соатдан сиз эрклидирсиз. Қачон истасангиз, Пешоварға қайта олурсиз. Отларингиз ўзингизники. Бироқ милтиқларингиз, тўппончаларингиз бизда қолсун.

Б а д р и н а т. Шошмангиз, Раҳимбахшон... Шу тилчи хотун янами қутулиб кетсун?

Р а ҳ и м б а х ш (*биринчи ишчига*). Юборингиз буни у дунёга!

Т и л ч и хотун (*ирғиб туриб ялинар*). Зайд соҳиб, мени бағишлангиз, менга ҳам шу буюрган эди. (*Юзбошининг гавдасини кўрсатур. Биринчи ишчининг тўппончасидан чиққан бир ўқ билан «воҳ» деб ийқулур, жон берар.*)

Р а ҳ и м б а х ш (*пўлисларға*). Дўстларим, нима қиласиз? Шу паллада шаҳарга қайтасизми? Эртагача шунда турализми?

Б и р пўлис . Хон соҳиб! Сиз ҳиндли, биз ҳиндли. Бу юзбоши бизни ўтри тутарға деб келтирган эди, биз кўриб, онглаб турубмизким, сизлар ўғри эмас экансиз. Сизларнинг тилакларингиз бошқача экан. Биз ётганларнинг хизматиндан безиб қолған. Бундан кейин сизга хизмат қиласиз. Сиз билан биргалашиб ёвни юртдан чиқарғали тиришамиз.

Ишчиларда шодлик.

Р а ҳ и м б а х ш . Кўб яхши. Юртимиз сиздек жонли, қонли йигитлардан иш кутадир. Сиз зулмга қаршу курашмоқчи бўлсангиз, биз қуллуқлар билан қабул қиласиз. Шундай бўлғач, келингиз, қучоқлашиб кўришайлик-да ўртоқлашайлик.

Ҳаммалари қучоқлашиб кўришурлар.

Б а д р и н а т (*бир пўлисларға*). Дўстим, сиз бориб отлар ёниндағи қоровулингизга ишни онглатингиз.

П ў л и с . Ҳўб. (*Кетмак истар*.)

Р а ҳ и м б а х ш . Орқадошим, ўз милтиғингизни олиб борингиз. (*Пўлис чатмадан ўз милтиғини олиб борар. Раҳимбахш қолған пўлисларға сўйлар.*) Эмди ҳаммамиз бирлашдик. Ўз милтиқларингизни олингиз. (*Пўлислар шодланаб, милтиқларини олурлар.*)

Б а д р и н а т . Энди ҳаммамиз бирга, ҳаммамиз ҳам Ҳиндустан учун тиришамиз. Йиртқичлардан элимизни қутқарамиз. Яшасун Ҳиндустан, яшасун истиқлол!

Ҳ а м м а л а р и . Юртимизни қутқарамиз. Яшасун истиқлол!

Югуриб тепадан тушарлар

Парда тушар

Б и т д и